

**SAMUEL  
LEKhabu NINA**  
**Samuel Lekhabu Nina Sung Thu**  
**Umdan**

David chu athil kilhen dihloou jeh'in gimna achunga ana lhung in, hitobanga kachonna chungang jong Pathen in ichan-a eingailut hitam? atin ahi. Alangkhat'a David chu Israelte leng ahinaleh Pathen toh kiguijopna neija houpa ahiti, akihedoh in ahi. Hijeh chun David dinga kinepna aum nahlai bang in, eiho jouse ding in jong kinepna aumin ahi!

*Lekhabu Jihpa Chule Ajih Kum*

Samuel lekhabu nini hi, koipen in anajih ham ti kichentah in akisei theipoi. Hinlah lekhabu kijih dungjujin Samuel, Nathan ahilouleh Gad jih hidin ginchat ahi (1Chro. 29:29 ven). Chule hiche lekhabu hi Solomon thinung leh lenggam kihop khen jou—925 BC a kijih ahi.

*Lekhabu Akijih Lona*

Hiche lekhabu hin Israelte thusim Saul thia pat David lengvaipoh kichai chan akiseijin, hichu 1010-970 BC sung ahi. Chule alhangpin kitahna le thungai louna jeh'a thilsoh thudol akimun ahi.

*Saul Thi David In Ahetdoh*

<sup>1</sup> Saul thi jouvin ahitin ahi, David chun Amalek mite chungang galjona aneijou vin ahung kinung len Ziklag munnah nini sung aumden in ahi.

<sup>2</sup> Anithum nin mikhat Saul's ngahmun a konin

von tel dehduh le aluchunga leiset nat pum in lunghem vetsahnan a hungin, David angsungah jana neitah in abohkhup tan ahi. <sup>3</sup> Chuin David in adong in, “hoiya kon hung nahim”? atileh amapan adonbut in, “Israel te ngahmun a kon hung jamdoh kahi” ati. <sup>4</sup> Chuin David in adongin, “Epiti hytam?” “Gal umchan thu neiseipih in” ati, chuin aman adonbut in, “kasepai te jouseu galmun akon ajam gam uvin, mitampin thina atoh un, chule Saul le achapa Jonathan jong athi lhon tai ati.” <sup>5</sup> Chuin David in Gollhangpa ja ah, “Eti Saul le Jonathan athi taiti nahet ham?” ati. <sup>6</sup> chuin mipan adonbut in, keima Gilboa molchungah kaga umkhan ahileh, hi ah chun Saul in a tengcha chu anaop phan chuleh agalmite sakol kangtalai holeh sakol them hon ahin delphah kon chao chu ahitai. ✧ <sup>7</sup> Chuin ama ahung kiheijin keima eimu phat in amakom adin eikoutai. Chuin keiman kadong ngin, Eti kaki thopi ding ham Katie. <sup>8</sup> Hichun aman eidonbut in, nang koi nahim eiti? Chuin keiman kaseipih in, keima Amalek mi kahi Katie. <sup>9</sup> Hichun ama kahengah ataovin, hung inlang neihung that tan, ajeh chu keiman kanat nahi kathoh jou tapon hijeh chun kathinom tai, ati. <sup>10</sup> “Hijeh chun keiman ama chu kathat tai,” tin Amalek mipa chun David komah aseitai, ajeh chu keiman kahet ahitai ama ahinjou tah lou ding chu. Hiti chun a Lallukhuh leh abanbul tom naho kahin lan nakom ah kahin lhut e ka Pakai, ati. <sup>11</sup> Hitabong thusoh chu David leh amiten ajah

---

✧ **1:6** 1 Samuel 31:1-6; 1 Thusimbu 10:1-6

doh phat un apon u abot eh un alung genthei lneh taovin ahi. <sup>12</sup> Hitichun amahon sun nilhum in Saul chule achapa Jonathan ding, Pakai sepai holeh Israel nam mite adin an angolun, akap un, pul adou un alunghem un ahi, ajeh chu hiche nikho a hi amaho chemjam a thisoh ahiuve. <sup>13</sup> Hichun David in thu hinpo gollhang pa komah chun aseitan, “hoiya kon hung nahim ati?” chuin aman adonbut in, keima gamdang, jatdang Amalek mi, nagam uva khosa kahi, ati. <sup>14</sup> Chuin David in adongin, “Epi tidan a nangman Pakai thaonu mikhat chu thading kichat na nanei lou hel ham? Atie. <sup>15</sup> Chuin David in amiho khat pen komah chun ase in, “that in!” ati, hichun mipan Amalek mipa chu achemjam in adot in athat tan ahi. <sup>16</sup> Chujou vin David in aseiyin, “Nang le nang themmo kichan nahi,” “ajeh chu nangman nakam tah a Pakai thaonu pachu kathat tai nati.”

### *Saul Le Jonathan Dia David Labol*

<sup>17</sup> Hitichun David in Saul le Jonathan din ka-la asemin, <sup>18</sup> Chuleh hichehi Judah te jong hilding ahitin thupeh anei in ahi. hiche la hi thalpi la tin akihen chuleh hichehi Jashar te lekhabu a kijih lut ahi. ✧ <sup>19</sup> Vo Israel naloupi nao le nakipa nao chu molsang chungah akithat tai! I ati leh galhang mihat hochu lhugam u hitam! <sup>20</sup> Gath muna athu hohi seidoh hih un, Ashkelon lamlen dungah jong phongdoh hih un, achuti louva ahileh Philistines Chanute kipah untin, chule cheptan louho jong galjou bangnga nuidiu

---

✧ **1:18** Joshua 10:13

ahi. <sup>21</sup> O nang Gilboa molsang, nachungah daitwi lhah da hen lang, gojong juhda hen, chule loujao va lou hon jong amuchiga hinsepdoh dahen. Ajuh chu mihatpa lumdal chu suhboh in aum tan; Saul lumdal chu thaotwi nulouva um ahitai. <sup>22</sup> Jonathan kineosah chu nasatah ahin, chule Saul chemjam chun na loupitah atongdoh in ahi. amahon agalmiteu thisan asou vin chule galhat, mi hangsan ho tahsa asun in ahi. <sup>23</sup> Iti ngailut le lungset um hitam Saul le Jonathan hi! Ahinlai sung lhon leh athigei lhon in aumkhom jing lhon in ahi. amanihi Muvanlai sanga gang joleh keipi bahkai sanga jong hatjo ahilhon in ahi. <sup>24</sup> Vo Israel Chanute, Saul a dingin kap un, ajuh chu amahi ponsanthip deium mantamtah a nachun pao le sana a najem pao chu ahi. <sup>25</sup> Iti galhat miho galmuna lhugam u hitam! munsang chungah Jonathan jong athisan akijam tai. <sup>26</sup> Jonathan kasopipa, nangjeh in kakap kap jeng e! ichan a kangailut nahi hitam! chule nangman neingailut nahi athuh lseh in, numei ngailut nasangin athuh jon ahi! <sup>27</sup> Iti mihat ho lhugam a! galmanchah ho mangsoh a, amaho athia kijam chap jeng hitam? ati.

## 2

### *Judah Te Leng Dinga David Thao Akinu*

<sup>1</sup> Hiche jouchun David in Pakai chu adongin, “Judah ho khopi khat pen pen akhu kalechi ding ham?” atin ahileh, Pakaiyin ahindonbut in, “henge kinunglen” ati. Hiche jouchun David in adong pei in, “hoichi pen khopi a kachi ding

ham?” atin ahileh, Pakaiyin a donbut in Hebron khopi ah ati. <sup>2</sup> David jiteni chu Ahinoam kiti Jezreel mi le Carmel kho a Nabal kiti meithaipa jinu Abigail ahilhon ne. hitichun David le ajiteu ✧ <sup>3</sup> Chuleh ama mite ho jouse leh a insung mite jouse chutoh Judah gam lamah akitol uvin, Hebron khopi kom ah chun acheng taovin ahi. <sup>4</sup> Hichejou chun Judah gamma mikhat David komma ahungin, amapa chun David chu Judah mite jouse chungang leng din thao ahungnui. Hiti chun Saul vuija pang ho chu Jabesh – gilead mite ahiuve ti David in ajah doh phat chun, ✧ <sup>5</sup> Aman hiche thuthot hi aneitao vin ahi: “nangho Pakaiyin phatthei naboh uhen ajeh chu nanghon na pakai pao Saul chungah naki tahnao navetsah un chule phatah in nanavui jun ahi. <sup>6</sup> Hijeh chun Pakaiyin ami ngailutna longlou chun naumpiu henlang chule kitahna neitah in nabol uhen! Chuguh hilouvin keima jeng in jong nathilpha bol nachung uva kipaman kapeh ding nahiuve, ati. <sup>7</sup> Tun Saul athitan, hijeh chun keima leng thah din Judah mite thao einu taovin ahi, hijeh a chu keiman katep nahiuve Judah mite bangin keima din hangsan tah le kitah tah in pang uvin.”

*Ishbosheth Israel Leng Dia Akiphong Doh*

<sup>8</sup> Ahin Ner chapa Abner, Saul’s sepai jalamkaipa chu Saul’s chapa Ishbosheth chutoh Mahanaim lam ah achilhon tan ahi. <sup>9</sup> Hiah chun Ishbosheth chu Gilead, Jezreel, Ephraim, Benjamin, Ashurites gamsung leh Israel pumpi jouse chungang leng din akiphong doh tan ahi.

---

✧ **2:2** 1 Samuel 25:42,43    ✧ **2:4** 1 Samuel 31:11-13

<sup>10</sup> Saul's chapa Ishbosheth chu kum somli alhing tan ahi Israel te chungang leng ahi chun, chule Mahanaim akon lengvai kumni ahinpo pan in ahi. alangkhat nin Judah mite vang chu David a din kitah tah in aum jing jeng un ahi. <sup>11</sup> David in Hebron chu munpi in asem in, chule Judah mite chungang kum sagi le lhagup sung lengvai anapon ahi.

### *Israel Le Judah Kah'a Kitomona*

<sup>12</sup> Nikhat Abner in Ishbosheth's sepai hochu Mahanaim akon Gibeon lam apui in ahi. <sup>13</sup> Hiche phat chat chun, Zeruah chapa Joab in David's sepai hochun apuidoh in Gibeon twikul ah agakimupiu vin ahi. chule hiche mun ah chun alang lang in atou un akigar vettou vin ahi. <sup>14</sup> Chuin Abner in Joab ja ah aseiyin, "Isepai teu themkhat emasang lhon ah kidelsah hite." Atin ahileh, "Joab jong anom tan ahi." <sup>15</sup> Hichun alang toa mi somleni cheh kideldin alheng doh taovin ahi – Saul chapa Ishbosheth langa din Benjamin mi somleni, chule David langa din mi somleni ma alhengdoh un ahi. <sup>16</sup> Mikhat cheh in akitopi hou sam atuh un chule achemjam un khat cheh pongpeh akisutpih to un ahileh abonchaovin athi taovin ahi. hijeh chun Gibeon mun hi eitih in chemjam a kidot namun tin akihe jing tan ahi. <sup>17</sup> Hiche jouchun anikho maman nasatah in akisatou vin chule David sepai techun Abner le Israel mite chu gal in anajou uvin ahi.

### *Asahel Thi*

18 Chule hiche nikho chun David sepai te la ah Zeruah chapate thum Joab, Abishai, chule Asahel apang uvin ahi. chule Asahel hi gam sakhi-nou banga jang tah a lhei thei mi ahi. 19 Chuin Asahel in Abner nung chu jungjelin mundang ema velou vin chule thil emacha jeh a kingapa lou vin adel tan ahi. 20 Hichun Abner akinunghei in ahileh amapa ahung chu amutan ahi, chuin aman akou in, “nangma Asahel nahiam?” ati. Chuin aman adonbut in, “henge keima kahi” ati. 21 Chuin Abner in agih in, “chin lang michomkhat gaman in! chule chapang khangdong jep khat chu man inlang amanchah lahpih in” ati. hinlah Asahel chun Abner lamchu jangkei in mundanga kiheidoh lou vin ajuipeh in ahi. 22 Abner chun Asahel chu ahinsam kit in, hichemun akon kihei mangin! Keiman nangma kathanom poi. Akhuti leh iti nasopipa Joab mai kamukit ding ham? Ati. 23 Ahin Asahel chu ama akon kiheimang ding anom dehpon, hijeh chun Abner in Asahel oipoh laitah atengcha bulgeijin asun lhum in ahileh atengcha chu anung langah apeidoh liu in hichun amun maman alhun athidan tan ahi. chule koi hileh hilaimun hinpaha a Asahel thi muchan chu akinga un adingdan taovin ahi. 24 Chuin Joab le Abishai in itabong thilsoh ham ti ahetdoh lhon phat in, Abner nung adel pei lhon tan, ahin Gibeon gamthip jotna lampi, Giah kom Ammah molsang agei lhonin nisan alhum den lhon tan ahi. 25 Benjamin phungmi Abner sepai ho chu akithah gopkhom kit un molsang chungah chun apang taovin ahi. 26 Chuin Abner in Joab chu ahinsam in, eitih chan a khat le

khat ekitha to jing diu hitam? achaina lungjin najeng ahihi nageldoh loulai uham? Etih tah leh namiteu chu nasopi Israel te nung ahindel naova kon nakham gah dinguh hitam? ati. <sup>27</sup> Chuin Joab in ahinsei in, “Pathen bouvin ahei epiti ding ham nangman ima nahinsei lou hileh, ajeh chu keima hon jankhovah hella kahin del thei u nahi.” <sup>28</sup> Hichun Joab in saki chu amutging in ahileh amite jouse chu adingdan un Israel sepai techu adel tapou vin ahi. <sup>29</sup> Chuchi jan chun Abner le amite chun Jordan phaicham chu ajot peh un, Jordan vadung chu agalkai un chule jingkah geijin achijomjing un Mahanaim alhun kahseu vin kinga lou vin anachijom jing un ahi. <sup>30</sup> Hitabang tah chun, Joab le amite jong inlam akile taovin ahi. chule Joab in amite athiho chu ahin simtan ahileh mi somleko le Asahel alhahsam chu ahinmudoh tan ahi. <sup>31</sup> Ahinlah Abner’s mi kithat jat chu jathum le somgup ahi, chule amaho chu abon va Benjamin phunga kon ngen ahiuve. <sup>32</sup> Chuin Joab le amite chun Asahel’s longchu Bethlehem lammah apuvin apa lhankhuh ma achun avuitao vin ahi. chujou vin amaho jankhovah keiyin akitolun jingkho ahungvah in Hebron alhung taovin ahi.

### 3

<sup>1</sup> Hichu Saul dia kitah tah a pang hole David dia kitah tah a pang ho kikah a sotpi kidouna anaum akipat na ahi. hitichun phat ahungchal chal in David chu ahung hat cheh cheh in, ahin Saul’s thanei na vang chu ahung kem suh cheh cheh tan ahi.



### *Hebron'a David Chapate Hungpen*

<sup>2</sup> Hichun David in Hebron khopi ah chapa phabep ahingin ahi: apeng masapenpa chu ahileh Amnon ahin amahi Jezreel mi ahinoam in ahinpeh ahi. <sup>3</sup> Chule anichan na chapa chu Daniel ahin amahi Carmel khoa Nabal inneipi meithai nu toh ahin lhon ahi, chule athum chan na chu Absalom ahin, Geshur lengpa, Tamai chanu Maacah in ahinpeh ahi. <sup>4</sup> Ali channa chu Adonijah ahin, anu minchu Haggith ahi. chule anga channa chu Abital in ahin Shephatiah ahi. <sup>5</sup> Chule agup channa chu Ithream ahin, David's jinu Eglah hin ahi. chapa hichengsehi David in Hebron munna ahin hochu ahi.

### *Abner In David Sepaite Ajop*

<sup>6</sup> David insung le Saul insung mite kah a kidouna aumjing laichun, Abner chu Saul insung mite adin lamkai thahattah ahung hitan ahi. <sup>7</sup> Nikhat chu ahitin ahi Saul's chapa Ishbosheth chun Abner chu apa thaikemnu Rizpah kiti Aiah chanu toh chun lumkhom danin angoh tan ahi. <sup>8</sup> Hichun Abner chu alungsou lneh jengin, "keimahi Judah te uicha bonga hitia pehlele ding kahim?" tin apeng jah jing tan ahi. "Keiman ijakai napa Saul, a insung mite chule aloile gol ho dia kaboldoh jouva nangho jeng jong David khut a kapeh doh lou nahiu vin, nangman hiche numeinu chungchanga kathemmo nading nahol, hiche hiham kachan ding chu? Ati. <sup>9</sup> Pakaiyin athu teppih chu David in amolso jou nadia keiman imacha a kakithopi lou poupouleh Pathen in keima eibolgim henlang eithat jeng

hen! ☆ 10 Keima kachi ding Saul's lenggam chu kalah a David khut a kapeh ding ahi. chule keiman David laltouna Israel le Judah mite chungu katundoh ding hichu sahlam Dan a pat lhanglam Beersheba gei hiding ahi. 11 Hichun Ishbosheth jong chun thudang aseibe tapon ahi ajeh chu Abner in epi ahinbol ding chu akichat ahi. 12 Chuin Abner injong sottol le hochu David kom asolin hitin aseisah tai, “gamsung pumpihi nanga hilou ham? Hijeh chun keima toh kitepna sem in, chuti leh keiman Israel mipi jouse hi nangmatoh apankhom nathei diuva kahin kithopi ding nahi, ati. 13 Chuin David in adonbut in, “aphai,” Ahin kajinu Michal, Saul's chanu chu nahung teng nahin lepui louleh nangma toh kihaolim na kaneilou ding ahi, ati. 14 Hiti chun David in hiche thuhi Saul chapa Ishbosheth chu athot tan ahi: “kajinu Michal chu neihin lepih in, ajeh chu keiman amahi Philistines mijakhat hinkho toh kahin kipuitha ahi.” tin aseitai. ☆ 15 Hijeh chun Ishbosheth injong Michal chu ajipa Palti, Liash chapa akon chun agapuidoh tan ahi. 16 Hitichun Paltin jong amanu nung chu Bahurim lamchan kap pumpum in ahinjui peh in, hichun Abner in aja ah, “inlam kinung letan!” ati. Chuin Palti jong inlam akinung le tan ahi. 17 Hitichun Abner'in Israel upa ho chu akihaolim pin, hitin aseipih tai, “nang hon phat khat lai a David chu naleng diuva nana dei u hilou ham?” 18 Hijeh chun tuhi aphant ahitai! Ajeh chu Pakaiyin hitin aseiyee, “keiman David hi

kami Israel te Philistines te khut leh agalmitau dang jouse akon huhdoh dia kalhen ahitai.”tin.  
<sup>19</sup> Chuin Abner in Benjamin mite kom injong agasei kit in, chujouvin Israel mite jouse le, Benjamin miten jong David kithopi ding anupna thu'u gasei din Hebron lam jonin achi tan ahi.  
<sup>20</sup> Chuin Abner le amite mi somni Hebron alhun uchun, David in golvah loupitah abolpin ahi.  
<sup>21</sup> Chujou vin Abner in David kom chun aseiyin, “keima chengting kapu lengpa tosot din Israel mipi jouse gakhom ingting chule amaho leng nahi thei nadin amahon nangma toh kitep na khat sem untin chule nangman amaho jouse chungah nangma lungdei bang tah in vaihom tan,” Ati. Hiti chun David in Abner chu asol tan ahile amapa jong lungmong tah in achitan ahi.

### *Joab In Abner Atha*

<sup>22</sup> Ahinlah David in Abner lungmong tah a asoldoh jou chat chun, Joab le David's sepai themkhat hochu michom a achi naova kon thil tampi toh ahungkile tha taovin ahi. <sup>23</sup> Chuin Joab ahung lhunlhun chun, mihon aseipih un Abner chun injo chat chun Lengpa ahungvil in chule ama lungmong tah in akisol doh tai atiu vin ahi. <sup>24</sup> Chujou vin Joab jong lengpa kom alhajelin ngehna aganei tan ahi, “nangman epi nabol hitam? epi nabol na a nangman Abner chu lungmong tah a nasol doh jeng hitam? ati. <sup>25</sup> Nangman kichenin nahenai ama chu nangma umchan kholtah ding le nathilbol jouse kholtah dinga hung ahi chu!” ati. <sup>26</sup> Chujou vin Joab'in David chu adalhan asot tolle hochun

Abner agamet uva ahin lepui diuvin asol tan ahi. chuin amahon Abner chu Sirah twikul akon ahin lepui un ahi, ahin David in thil umchan emacha ahepoi. <sup>27</sup> Chuin Abner Hebron ahung le lhun tan, hichun Joab'in amachu kelkot phung lamah achanga kihaolimpi ding bang in apuidoh tan ahi. hinlah Abner chun asopipa Asahel phulah nan a oipoh laitah chu asutpih in athat tan ahi. <sup>28</sup> Hitabang thilsoh David in ajahdoh phat chun, hitin thuphon aneitai, "Pakai minna kakitep ahi Ner chapa Abner chungchang thua hi keima le kalenggam eitih a mona neilou kahiueve ati. <sup>29</sup> Joab le a insung mite jouse themmo changah ahitai. Chule Joab insung mite akon hitabong gaosap na, thisan a long damlouna, tiphah, tenggol kiphu a lamjotna, chemjam a thina chule anneh lhah sam nahohi akhang khang uvin umjing hen. <sup>30</sup> Hiti chun Joab le asopipa Abishai in Abner chu athat lhon tan ahi ajeh chu Abner in asopipa lhon Asahel Gibeon galmun na atha jeh ahi.

### *Abner Thi David Lunghem*

<sup>31</sup> Chuin David in Joab le aumkhompi hocheng kom achun hitin aseiyee, "napon jouseu bot eh unlang khaodip pon jeng kivon un chule Abner adin lunghemmun ati. Chuin leng David amatah jong vuinalam a chi miho nung chu ajuitan ahi. <sup>32</sup> Hiti chun Abner chu Hebron munna avui taovin, chule lengpa le mipi jouse chu Abner lhan chungah chun akap tao vin ahi. <sup>33</sup> Chuin lengpan Abner dingin hiche mithila hi asai: "Abner chu mingol thi a thiding hitam? <sup>34</sup> Nakhut

tenila akikan pon; nakeng tenila akisompon. Migilouho kitha bangin nangma naki that tai” atin ahileh, mipi jouse chu Abner adin akapkit uvin ahi. <sup>35</sup> Hiche Abner thi nikho chun nehding jouse David adatan hinlah mipi jouse chu ataovin netei in atiuve. Hinlah David in kitepna asem in, hitin aseiyé, “keiman nilhum masanga epi hijong leh kaneh poupouleh Pathen’in isugim henlang tha jong ithat jeng hen, ati. <sup>36</sup> Hichun mipiho chu alunglhai shah lleh taovin ahi. chule ahimongin, lengpa thilbol jouse chun amaho alunglhai sah un ahi. <sup>37</sup> Hitichun Abner’s kithana chung changa David in pan alahlou dan Judah a um mijouse le Israel mite jousen ahethem taovin ahi. <sup>38</sup> Chuin leng David in a sepai lamkai ho kom chun aseiyin, “tunia Israel sunga lamkai jaumtah khat alhuh hi geldoh lou nahi ham? <sup>39</sup> chule keima hi lengdia thao kinusa hijeng jong leng, Zeruah chapateni – Joab le Abishai hi keiman kathunoi a kakoidin ahatheset lhonin ahi. hijeh chun Pakaiyin migiloupa chu athilpha lou bol dung jui in lethuh taken,” ati.

## 4

### *Ishbosheth Kitha*

<sup>1</sup> Chuin Saul’s chapa Ishbosheth in Hebron munna Abner’s athi chung chang ajah chun ahansan najouse abei tan chule Israel pumpi jong kichat nan adim taovin ahi. <sup>2</sup> Tun Ishbosheth’s in sepai galamkai Rimmon chateni Baanah le Recab chu anei in, amani chu Benjamin phungmi Beeroth a cheng ahilhon ne.

chule tun Beeroth khopi chu Benjamin's te gam-sung ahitan ahi. <sup>3</sup> Ajeh chu Beeroth mimong mong hochu Gittaim ah anajam lutnun, tungei-jin khopem mi bong ngin aching taove. <sup>4</sup> (Chuin Saul's chapa Jonathan in chapa khat anei in amin Mephibosheth akitie, chule amahi aneova pet elbai ahi. Jezreel akonna Saul le Jonathan gal munnah atitai tithu ahung chun ama kum nga bou ahinalai in ahi. hitabong thusoh chapangpa jenlenun ajah doh phat in ama chu aman in ajampi tan ahi. hinlah amanu akinovar jeh in chapangpa chu akheh shah tan ahileh amachu akeng ahung bai tan ahi). ☆ <sup>5</sup> Nikhat chu Beeroth akon Rimmon chapateni Recab le Baanath chu Ishbosheth's in'ah sun in agachi lhon in ahileh amapa chun sun kichol anabol in ahi. <sup>6</sup> Chuin kotngah a pangnun, chang anasep in ahileh aimut sophat in ana emulhatan ahi. hijeh chun Recab le Baanah jong chun amanu chu akalchuh lhonin achipei lhon tai. <sup>7</sup> Insung alut lhonin ahileh Ishbosheth alupna chungga analup amulhon tan ahi. hichun anailut lhonin avolih lhonin alol atanpih lhon tan ahi. chujou vin alu akichoi lhonin Jordan phaicham geijin jankhovah hellin ajam lhon tan ahi. <sup>8</sup> Chuin Hebron alhun lhonin Ishbosheth's lu chu David api lhon tan ahi. chuin lengpa hengah apeng jah jeng lhonin, "ven!" hichehi nagalmi nangma that dia kigo Saul chapa Ishbosheth luchang ahi. tunin Pathenin ka pakai lengpa dingin Saul le a insungmite chungga phu alatan ahi. <sup>9</sup> Ahin David in Recab le Baanah jaah hitin aseiyin, ka Pathen, kagalmite jouse a

---

☆ 4:4 2 Samuel 9:3

kon eihuhdoh pa minna kasei ahi. <sup>10</sup> Khatvei mikhat in Saul athitai tin kakommah ahung seiye, amapachun keimadia thupha hinpo dan a kigel hite. Hinlah keiman ama chu kapui in Ziklag munnah kagathat tan ahi. hichu amadia ahin thupoh man a kapeh ahi. ☆ <sup>11</sup> Akhuti leh keiman kho hepha louva ainsunga alupna a lumpa that migilou hochu echangeija kipaman kapih ding hitam? keiman ama thisan phuhi kalah da a leiset chungu jong kasuh mang da lhon ding ham? ati. <sup>12</sup> Chuin David in amani that din agollhang hochu thupeh anei in, chule amahon jong abol taovin ahi. chuin amahon akhut, akeng atepih un atahsa chu Hebron twikul kommah akhai taovin ahi. chujou vin Ishbosheth's lubuh chu achoi un Hebron muna Abner's lhan ah chun avui tao vin ahi.

## 5

### *Israel Mipi Jouse Chungu David Leng Ahi*

<sup>1</sup> Chuin Israel phungmi jouse Hebron munna David kom achiu vin ahengah hitin aseijui, "keihohi nangma tahsa le thisan jeng kahiuve. <sup>2</sup> Achisa phat lai a Saul kaleng u ahilai jeng in-jong, nangma bou nahi Israel sepai te analamkai chu. Chule Pakaiyin nahengah aseiyin, 'nangma hi kami Israel te chingpa nahi ding ahi. nangma hi Israel's te lamkai ding nahi.'" 'Atiuve. <sup>3</sup> Hijeh chun Hebron munnah ahitin ahi, leng David in Pakai masang le Israel upa ho jouse masang ngah kitep nakhat asem tan ahi. chuin amahon

---

☆ **4:10** 2 Samuel 1:1-16

Israel mite chungah leng din thao anu taovin ahi.  
 4 David in lengvai ahinpoh chun atahsa kum kum somthum alhing tan ahi, chule kum somli sung lengvai anapon ahi. ☆ 5 Chuin Judah mite chungah kum sagi le lhagup sung Hebron akon vai anahom in, chule Jerusalem akonnin Israel le Judah mite jouse chungah kum somthum le kum thum sung leng vai anahom in ahi.

### *David In Jerusalem Alah*

6 Chuin David in asepaite alamkai in Jerusalem lamma Jebusites mite toh kidoudin achitao vin ahi, chule amahohi agam a chengden mimong mong ho chu ahiu vin ahi. chuin Jebusites miten hitin David hengah ahinseyui, “nangho hichemun hin hunglut jou pou vin nate, mitcho le elbai ho jeng injong nadeldoh jou diu ahi atiuve!” ajeh chu ama hohi bitkei a umdan na kigel u ahi. ☆ 7 Ahilah David in khopi dettah Zion khopi chu alatan ahi, tunin hiche mun chu David khopi akiti tai. 8 Chuchi agabulu nikhou chun David in a sepai ho hengah hitin aseiyee, “keiman Jebusite mi mitcho hole elbai ho chu kavet nompoi. Koi hileh agabulu ding hochu twilam apet khopi sung lut diu ahi.” hichu thu kisei abul ahi, “mitcho hole elbai ho chu insung lut man lou Meithei u ahi.” ati. 9 Hitichun David in akulpiu chu a inmun in asemin chule David khopi asah tan ahi. chule David in khopi sung chu achung langah ahinpan in aasung lang gei in akeh len ben ahi. 10 Hitichun David jong ahung

---

☆ 5:4 1 Lgt 2:11; 1 Thusimbu 3:4; 29:27 ☆ 5:6 Joshua 15:63; Thutan Vaihom Ho 1:21



thahat cheh cheh jengin ahi, ajeh chu Pakai Van Pathen sepai ten ama aumpi jeh u ahi. <sup>11</sup> Chuin Tyre gamma lengpa Hiram in David hengah sottol le hochu Cedar thingho, thingthem bolho, song insathem ho chutoh asol than amahon David leng inpi ashah pih taovin ahi. <sup>12</sup> Hichun David in Pakaiyin Israel mite jouse chungang leng dia atun nale ami Israel te khohsah najalla aleng gam phatthei aboh chu ahin geldoh tan ahi. <sup>13</sup> Hebron akon Jerusalem akichon doh jou chun, David in ajiding le thaikem ding akipui ben, chule amahon chapa le chanu ahinbe pih un ahi. <sup>14</sup> Hiche hohi David chapate Jerusalem a peng ho min ahi: Shammua, Shabab, Nathan, Solomon, <sup>15</sup> Ibhar, Elishua, Nepheg, Japhi, <sup>16</sup> Elishama, Eliada, chule Eliphelet ahiuve.

### *David In Philistine Te Ajo*

<sup>17</sup> Chuin Philistine ten David chu Israel te leng dia thao akinu ajah doh phat un, amahon asepai te jouse chu David mandin akigut shah taovin ahi. hinlah amaho ahung uchu David akiseipih tan, hichun ama kulpidet lamma achitan ahi. <sup>18</sup> Chuin Philistine tejong ahung lhung un chule Rephaim phaicham lam geiyin akithe thang taovin ahi. <sup>19</sup> Hichun David in Pakai adongin, “keima kapotdoh a hiche Philistine mite hi kaga kisatpi ding ham? Nangman amaho chungang galjona neipih ding ham?” ati. Chuin Pakaiyin David ahin donbut in, “henge, chijengin. Keiman amaho khu nangma khut a kapeh tei ding ahi.” atitai. <sup>20</sup> Chuin David in Baal – perazim lam ajonin hiche mun ah chun Philistine te ajou tan

ahi. chuin David in hitin asekiye, Pakai bola ahi! aman kamelma jouse twi kithe thang bangin athe thang tan ahi. hijeh chun aman chi mun chu Baal – perazim asah tan ahi. (hichu Pakaiyin athethang tina ahi). <sup>21</sup> Philistines miten hiche mun ah chun amilimdoi houchu adalhao vin, chule David le asepai ten amaho chu ala taovin ahi. <sup>22</sup> Chuin phat chomkhat jouvin Philistines mite chu akile kit un, chule Rephaim phaicham geijin aga kithe thang kit un ahi. <sup>23</sup> Chule David in epi kabol ding ham tin Pakai chu adong kit in ahileh. Pakaiyin hitin ahin donbut nin, jangkei a nachiuva naga bulu tah lou diu ahi, hinlah anung lam uva kon naumkol diu chuteng poplar thing kom akon nabulu diu ahi ati. <sup>24</sup> Chule nanghon poplar thing chung lamma mikijot kengto gin najah teng ule kiging sadem a naum diu ahi! hichu Philistine mite chungga galjona nanei thei nadiuva Pakaiyin nachungvum uva nalhonpi nao melchih na hiding ahi. <sup>25</sup> Hijeh chun David injong Pakaiyin athupeh bang chun abollin, Philistines mite jouse chu Gibeon apet Gezer changei in atthat gam tan ahi.

## 6

### *Kitepna Thingkong Jerusalem Akilhut*

<sup>1</sup> Chuin David in avellin Israel mi galhang sangsom thum kilhengdoh ho chu akoukhom kit in ahi. <sup>2</sup> David in amaho chu alamkai in Judah gamma Baalah kom a Pathen thingkong chu gale poh din achi taovin ahi, hichu van pathen sepai ho minna kikou, alai a Cherubim

lal touna um chu ahi. ☆ <sup>3</sup> Hichun Pathen thingkong chu bongkang thah chungah aheng un chule molchung lamma Abinadab's in akon ahinpudoh taovin, chule Abinadab's chapateni Uzzah le Ahio chun bongkang chu ahintol lhon in ahi. ☆ <sup>4</sup> Pathen thingkong kipoh nachu. Chule Ahio chu thingkong masangah achin ahi. <sup>5</sup> Chuin David le Israel mipi jouse chun Pakai masangah la a asaovin, chule tunging thei jouse – pengkul, selangdah, khongpi, selki, chule sumlheng jouse suging pummin golnup abol taovin ahi. <sup>6</sup> Ahinlah amahon Nacon changphol mun ahin phah uchun bongchal teni chu akipal lhu lhonin ahileh Uzzah chun akhut ajahdoh gangchal in Pathen thingkong chu atuh tan ahi. <sup>7</sup> Hichun Pathen lunghan nachu Uzzah chungah achutan hijeh chun Pathennin Uzzah chu amun maman Pathen thingkong komah chun atah tan ahi. <sup>8</sup> Pathenin Uzzah chungah alunghan ahinbuh lhah jeng jeh chun David alung phamo leh tan ahi. hijeh chun aman hiche mun chu Perez – Uzzah asah tan ahi (hichu Uzzah chungah thunoh lhunna mun tin na ahi), tuni chanin akisaah tan ahi. <sup>9</sup> Hiche thilsoh jou apet chun David in Pakai chu akicha leh tan, hijeh chun aman Pakai chu adong tan ahi, “eti keiman Pakai thing kong hi keima vetsui nanoi a kahin le choilut thei ding ham?” ati. <sup>10</sup> Hijeh chun David in Pakai thingkong chu David khopi a pohlut lou din pha asah tai. Hinlah Gath mi Obed – edom insung injoh apolut tan ahi. <sup>11</sup> Pakai

---

☆ **6:2** Potdohbu 25:22 ☆ **6:3** 1 Samuel 7:1,2

thinkong chu Obed – edom insungah lhathum sung aumden nalai in, hijeh chun Obed – edom le a insung pumpi chu Pakai Pathen in phatthei abohtan ahi. ☆ 12 Hichun leng David chu hitin akiseipih tan ahi, “Pakaiyin Obed – edom’s insung pumpi le aneijouse phat thei abohtan ahi Pathen thinkong jeh chun.” Hijeh chun David jong achin Pathen thinkong chu Obed – edom insunga kon david khopi lammah kipa golnup loupitah pummin ahin potan ahi. 13 Chuin Pakai thinkong puhon kalgup ason jou un, David in bongchal le bongnou thaochat in kilhaina aboltan ahi. 14 Chuin David chun thempu ho sangkhoh chol akiah in atha neina jouse pummin Pakai angungah alam tan ahi. 15 Hichun David le Israel mipi jouse chun Pakai thinkong chu kipah thong jeju le kelchaki mutging toh thon aputou taovin ahi.

*Michal David Chunga Alung Himo*

16 Ahin Pakai thinkong chu David khopi alhut taovin ahileh, Saul chanu Michal chun abang kot akon ahin suhvet tan ahi. chuin amanun leng David Pakai angungah akhut alea alam chu amutan ahileh amanu chu David chung ngah lung himo nana dim tan ahi. 17 Chuin Pakai thinkong chu ahin puvin David in akoi nadia asem ponbuh sungah chun akoi taovin ahi. chuin David in Pakai angah kilhainan govam thilto le chamna thilto aneitan ahi. 18 Chuin kilhaina abolchai in, David in mipi jouse chu van Pathen minin phatthei aboh taovin ahi. 19 Chuin Israel pasal

---

☆ 6:11 1 Thusimbu 26:4,5

jouse le numei jouse chu changlhah phengkhat cheh, sachan khat cheh, le lengpi theija kistem changlhah khat cheh ahoppih un ahi. chujouvin mipi jouse chu a inlam cheh un akile taovin ahi. ✧ <sup>20</sup> Hitichun David'in ama insung mite phatthei boh ding tia inlam akile chun, Saul chanu Michal ama kimupi din ahungpot doh in ahi. amanun jalou tah in hitin aseiyee, "eti jachat um hitam tuni Israel lengpan mingol khat in abol ding tabanga asaguhkiuva asoh numeiho masanga aum jeng chu!" ati. <sup>21</sup> Chuin David in Michal chu alethuh in, "keima Pakai napa te le ainsung mite jouse chung vum'a eilhengpa! Pathen mi Israel te chung lamkai dia eingansepa masanga chu kipah a lam kahi ati. <sup>22</sup> Henge, hisanga ngoljo a umding jong kanome chule keima mitmutah a kineosah ding jong! Ahin soh numei naminphah ho vang chun keimahi chingtah a eigel diu ahi! ati. <sup>23</sup> Hitichun Saul chanu Michal chu ahinkho lhumkei jin chaneilou vin aum tan ahi.

## 7

### *David Dinga Pathen Kitepna*

<sup>1</sup> Leng David a leng ipia aum chun Pakaiyin akimvel a agalmite jouse akonin kicholdona apetan ahi, <sup>2</sup> Chuin lengpan Themgao Nathan kommah hitin aseiyin, "ven," keima cedar in hoitah sungah kachengin, ahin Pathen thingkong chu ponbuh sungah aum jing nalai e! ati. <sup>3</sup> Chuin Nathan in lengpa chu adonbut nin, "chitan nangman nalunga umcheng chu gaboldoh tan,

---

✧ **6:19** 1 Thusimbu 16:43

ajeh chu Pakaiyin nangma naumpin ahi,” ati.  
4 Ahin chuchi jan ma chun Pakaiyin Nathan hengah ase in, 5 “Chinlang kasohpa David khu gaseipih tan, “hichehi ahi Pakaiyin aphondoh chu: nangma hi nahim keima chenna ding in sading chu? 6 Keima in’a kacheng khapoi, Israel mite Egypt gamma kahinpuidoh nikhou va pet tuni changei in. amavang ponbuh le houbuh a keima kaum jingin hitichun munkhat akon munkhat ah kakichon jing in ahi. 7 keima Israel mite toh hoilai mun a kachinao hijong le, khatvei jeng jong Israel phung lamkai chule kami Israel te chinghoi ho ja ah, epidinga keima chenna ding Cedar in hoitah neisahpih lou uham? tin kana phun khapoi. 8 “Tun chinlang gaseitan kasoh David hengah, “Pakai van janel in hitin aseiyeh: keiman nangmahi hamhing lah a kelngoi nachin na akon kami Israel te lamkai dinga kalhen nahi,” tin. 9 Nangma hoilai mun nachinao hijong leh keiman kahin lhonpi jingin, chule nagalmite jouse namit mutah in kasumang tai. Chule tuahi keiman leiset chungga miminthang khat banga namin kakithan sah ding ahi! 10 Chule keiman kami Israel te achenna diu munkhat kapeh ding, hiche mun achu buina umlouva dettah a kaphudet diu ahi. Achisa a banga migilou nam miten asuhbui thei tah lou diu ahi. 11 Kami Israel te chungga vaihom dia thutan vaihom ho kalhen nikhoa pet ana chuti ahi. Chule keiman nagal miteu jouse akon choldona kapeh diu, chukal vallin jong Pakaiyin ase in aman nangma inkhat nasah pih ding – leng insung katun doh pih ding ahi,! tin. 12 Ajeh chu nangma nahung thia chule

napu napa tetoh nahung kivui jou teng, keiman nangma chilhah, nataigui a peng mong mong khat kahin tundoh ding, chule keiman aleng gam chu katha hatsah ding ahi. ✧ <sup>13</sup> Ama chun keima minna in khat asah ding chule keiman alenggam chu atonsot a kasuhdet peh ding ahi. <sup>14</sup> Keima ama pa kahi ding chule ama kachapa hiding ahi. Ijem tia achonset khah tah leh, mipa khat in acha abolna banga keiman amachu kamoljolla kasuhdih a kasuhgim ding ahi. ✧ <sup>15</sup> Ahin kamihepina Saul chungga kalah manga, nanga kon katol mang banga amachunga vang kalah mang louhel ding ahi. <sup>16</sup> Chule na insung le na lenggam chu eimatih channa kamasanga umjing jeng ding, chule nalal tou nachu eimatih channa bitkeicha umjing ding ahi, tin gaseipih tan ati. ✧ <sup>17</sup> Hijeh chun Nathan Themgaopa chu David hengah akinung len Pakaiyin gaova aseipih cheng chu agaseipih tan ahi.

### *David Kipana Taona*

<sup>18</sup> Chuin leng David chu Pakai angsumah alut in chule atou in atao tan ahi, “O thaneipen Pakai, kei koi kahi a, ka insunghi epi hija hichangeija neihin puilhung ham? <sup>19</sup> Chule tunjong thaneipan Pakaiyin, imajouse chung vum in nasohpa lenggam hi atonsot a peh ding natie! Hiti monga hi mijouse toh nana kitep mong hinam? O thaneipan Pakai. <sup>20</sup> “Keiman nahenga epi kaseibe ding ham? Thaneipen Pakai, Nangman nasohpahi etabang kahi nahesoh nai.

---

✧ **7:12** Labu 89:3,4; 132:11; Jn 7:42; Act 2:30 ✧ **7:14** Labu 89:26,27; 2 Crth 6:18; Heb 1:5 ✧ **7:16** Labu 89:36,37

<sup>21</sup> Ajeh chu nangman nakitep nabang le nangma lungdei bangin thiljousehi loupi tah in nabollin chule nasohpa neihet sah soh tai. <sup>22</sup> “Eti loupi nahitam, O thaneipen Pakai! Nangma bang koima aumpoi. Chule keimahon nang tabang Pathen dang kanaja kha hih hel uve. <sup>23</sup> Leiset chungahi namdang nami Israel te tabang umkha em? Namdang hohi epi hiuham O Pathen, nangman asoh chan naova kon namite dia nahuhdoh mong em? Nangman namite Egypt akon nahuhdoh chun nangma min nasuloupin ahi. chule nangman bolmo kidang loupi tah nabollin namdangte leh apathen hou chu namite masang akon nadelmang soh helle. ✧ <sup>24</sup> Chule nangman Israel mite chu eimatih channa namite din nasemin, chule nangma, O Pakai a Pathen u nahi tai. <sup>25</sup> “Chule tun, O Pakai le ka Pathen, keima nasohpa kahi; nangma nakitep na bang chun keima leh ka insung chungah bol tan. Chule atonsot a umjing din nakitep na chu phutdet tan. <sup>26</sup> Chule namin eimatih channin jaum hen khuti leh mijousen seijun tin, Pakai vanmi janel Pathen chu Israel te Pathen ahi! chule nasohpa David insung chu namasangah eimatih channin umjing hen. <sup>27</sup> O Pakai vanmi janel, Israel te Pathen, keiman hiche taona neina ding hin hansen na kanei e ajeh chu nangman hicheho jouse hi nasohpa hengah naphong doh in, hitin naseiye, ‘keiman nangma ding leng in kasah doh pih ding nahi nati!’ <sup>28</sup> Ajeh chu nangma Pathen, Thaneipen Pakai nahi. Nathusei ho adih soh kei in, chule hitabong thilpha jouse

---

✧ **7:23** Danbu Ni Na 4:34



hi nasohpa din nakitem e. <sup>29</sup> Chule tun, nasohpa insung phatthei boh ding hi nangma lunglhai na hihen, khuty leh atonsot a nangma angunga kaum jing thei diu ahi. ajech chu nangma thaneipen Pakai in nasei in, nasohpa phat thei boh ding nati chu, atonsot atonsot a phatthei na ahi.

## 8

### *David Sepaiten Gal Ajo*

<sup>1</sup> Hitichun David lengpan Philistine mite dia akhapiu len pen Gath khopi chu gal in alatan, hijeh chun Philistines mite chu ajo in chule asunemsoh tan ahi. <sup>2</sup> Chule David chun Moab mite jong gal'in akisatpin ahileh ajo kit'in, amite chu asimtoh chet in, hichun abonchan tol'a alup sah soh keyyin, hitichun line a akigol sah soh keyyin, hiche line ni chan na geiya kigol ho jouse chu tha din thu apen, ahin adangse vang chu ahing hoiyin, hiche ahinghoi ho chengse vang chu David dingin soh in apang soh kei tauve. <sup>3</sup> David chun Euphrates vadung geija agam akeh let nom jeh in achepeh in Zobah lengpa Rehob chapa Hadadezer jong gal'in akisat pin ahileh ajo kit tai. <sup>4</sup> Hadadezer khut'a konin David chun sakolkang sangkhat le sakol touthem mi sang sagi amanin, chule kenga galbol sepai sang som ni amane; chujongle sakol kangtalai jakhat kaiding tilou adangse chu akeng atanboh peh soh kei tan ahi. <sup>5</sup> Damascus khopia cheng Syria mite chu Hadadezer kiti Zobah lengpa kithopi dia ahunguvin ahileh, David in hiche Syria miho jong chu sangsomni le sangni ma athat kit'in

ahi. <sup>6</sup> Chujouvin David chun Aram gamsunga Damascus khopia jong sepai hon khat atousah tan ahi; hiti chun Syria mite jong chu David soh ahiuvin, don le kai ima apejuve. Hitobang hin David chu agalkon na chan nah Pakaiyin galjona apejing in ahi. <sup>7</sup> Hadadezer sepaite manchah sana ompo jouse chu David'in alan Jerusalem a ahinpo lut soh keiyin ahi. <sup>8</sup> Hichun Hadadezer khopi te ni Tebah le Berothai a konin jong David chun sum-eng tamtah jong ahin chom doh kit in ahi. <sup>9</sup> Chuin Hamath lengpa Toi kitipan jong Hadadezer sepaite abonchan David'in gal in akisat pin ahileh ajou tai, ti ajah doh phat in; <sup>10</sup> Toi lengpan jong achapa Joram chu David lengpa koma salam bolgun set din asol tan ahi; Ipijeh-inem itileh David chun Hadadezer kitipa gal a akisatpia ajojeh ahi; ajeh chu Hadadezer hin Toi lengpa akisat pi jing jeng anahi. Joram hin dangka le sana chule sum-eng ahin poh peh in ahi. <sup>11</sup> Hichun David in Joram thil hinpoh chengse chu alan aman achom doh namtin vaipi a kona gal ajo tengle akilah dangka le sana jouse pumin Pakaiya athenso thatai. <sup>12</sup> Hiche thil ho hi Edom gam'a kona ahinlah jong aumin, Moab gam'a kona ahin lah jong aumin, Ammon mite akona ahin lah jong aumin, Philistines mite a kona ahin lah jong aumin, Amalek mitea kona ahin lah jong aumin, chule Zobah lengpa Reboh chapa Hadadezer chapa a kona achom doh chengse jong ajaovin ahi. <sup>13</sup> Chuin ahung kile kit lamin jong chikhuh phaicham a Edom mite mihem sang som le sang get ahin that pa kit'in ahileh David chu aminthang cheh tan

ahi ☆ 14 David chun Edom gamsunga jong sepai atousah in, hijeh chun Edom mite jong abon-chauvin David soh ahisoh tauve. Hitobang tah hin David chu gal akonna chan a Pakaiyin gal ajosah sah jeng tan ahi. 15 David chun Israel pumpi chungga lengvai anapon, chule amite adin apha le adih jeng anabol in ahi. 16 Zeru'iah chapa Jo'ab chu sepai lamkaiyin anapangin, Ahilud chapa Jehoshaphat chu leng thuchingin anapangin ahi. 17 Ahitub chapa Zadok le Abiathar chapa Ahimelech chu thempun anapang lhonin ahi; chule Seraiah kitipa chu lekha sun in ana pang in ahi. 18 Jehoiada chapa Benaiah chu lengpa vengbitho lamkai in anapangin; chule David chapate ho chu thempu ho lamkai in apanguvin ahi.

## 9

### *David In Mephibosheth A-Khotona*

1 “Nikhat David in adongin, Saul insung mite khat beh ahing naum nalai'u vem? Jonathan jal'a keiman khutona kamusah thei ding tin adongin ahile, ☆ 2 Saul insunga soh natong ho lah a mi khat anaum khan ama chu amin Ziba akiti; Hichun lengpan jong amapa chu adongin, “Nang hi Ziba nahi hinam?” tin adongin ahileh. Hichun Ziba in jong adonbut in “Henge keima Ziba chu kahinai,” ati. 3 Chuin lengpan adongin, “Saul insung mi khat beh ahingdoh um nalailou ham? Aum leh, keiman Pathen mi khutona chu kamusah nom uve atileh; Ziban jong lengpa

---

☆ 8:13 Labu 60 ☆ 9:1 1 Samuel 20:15-17

ahindonbut in, henge, “Jonathan chapa khat aum nan, ama hi akengphang te ni chatmoa kibai ahi,” atipeh e. ✧ <sup>4</sup> Chuphat in lengpan jong, “Ama chu hoiya umham?” tin ahin dong tan ahileh; Ziban lengpa chu aseipeh in, “Ama chu Lodebar khoa Ammiel chapa Makir In a um ahi,” ati. <sup>5</sup> Hichun David lengpan mi asolin, ama chu Makir In na konin agapuidoh sah tai. <sup>6</sup> Hiti hin Saul tupa Jonathan chapa Mephibosheth kitipa chu David koma ahungin alu kunin jana apen ahi. Chuin David chun ahoupin, “Mephibosheth atileh; aman jong, “keima nasohpa kahi,” tin adonbut’e. <sup>7</sup> Hichun David’in akoma hitin aseieye, “Kicha hih in, keiman napa Jonathan jal a nanghi kakhoto ding, chujongle khatvei napu Saul neilegou anahikhasa jouse chu aboncha nangma kapeh kit ding nahi; chule nangman hiche leng ankong phunga hi keima toh an naneh khom ding ahiye,” ati. <sup>8</sup> Hichun Mephibosheth jong chun jana ape kit’in aseikit’e, “Nasohpa kei hi ipi kahiya nangin hiche uicha thisa tobang chungu hi khutona neimusah khoh ding ham?” atitai. <sup>9</sup> David lengpan Saul sohpa Ziba chu akouvin akoma hitin aseipeh’e, “Ipi hijongle Saul thilkeo anei jouse leh ama insung mite nei jouse chu aboncha hiche napu chapa hi kapeh ahitai. <sup>10</sup> Hijeh a chu napu chapa hin anneh akimu jouna dinga nangma le nachapate, chule nasohnten ama dinga lou nabol peh dingu ahin, alousoh ga nahin poh pehji dingu ahi; ahin hiche Mephibosheth napu tupa vang hin keima ankong phunga an aneh jing jeng ding

---

✧ 9:3 2 Samuel 4:4

ahi,” tin thu apetai. Ziba kitipa hin chapa som le nga ananeyin, soh jong som ni jen aneyin ahi. <sup>11</sup> Chuin Ziba in lengpa koma aseijin, “Kapu lengpan nasohpa keima neithupez bang bang chun nasohpa hin gabol nange,” ati. Hiti chun hiche nikho apet chun Mephobisheth hin lengpa chate lah a khatpen bang in David ankong phunga chun an anejing jeng tan ahi. <sup>12</sup> Mephibosheth jong hin chapa gollhang khat aneyin, amin jong chu Mica ahi. Chunikho apet chun Mephibosheth soh natong din Ziba insung mite abonchan apang tauvin ahi. <sup>13</sup> Hiti hin Mephibosheth akengphang te ni kibai pachu Jerusalem a achangin, chule aniseh in leng ankong ah an anejing tan ahi.

## 10

### *David In Ammon Mite Ajo*

<sup>1</sup> Hiche joupbat chomkhat jouvin, Ammon mite lengpa Nahash chu athitan, hijeh chun achapa Hanun kitipan Ammon mite chungah lengvai ahinpo tan ahi. <sup>2</sup> Hichun David'in jong aseiyin, “Nahash chapa Hanun hi apan keima jana neitah a eina bol bang banga ken jong amahi jana neitah a kabol ding ahi,” tin anaseiye. Hijeh chun David'in jong sottolle ho asol'in Hanun chu apa thi jeh a lhem mong din asol peh e. ahin David sottolle ho chu Ammon mite gamsunga aga lhun phat un, <sup>3</sup> Ammon mite lamkai hon apupau Hanun koma chun aseiyuvin, ‘Nangman nagelthei mong hinam hiche mihohi napa jabol dinga hichemun hung ahi tia? Ahipoi! David'in

khopi hi hunga suhgam ding agot jeh a sottolle hohi khopi sung kholtoh leh velhi le dinga ahinsol ahibouve tin aseipeh tauve. <sup>4</sup> Hijeh chun Hanun hin David sottolle ho chu abonchavuin aman in melse tah in akhamul akeh langkhat avo chaipeh soh keyyin, chule aponsilu le akivon nau akimlai tah akongbuh dontah achetan peh soh keijun jachat umtah in anungsol taovin ahi. <sup>5</sup> Hiti chun David sohte chung a thusoh ho David in ajahdoh phat in, amiteho thu gaseipih din mi asol tan ahi “Nakhamul’u akikhan lhit kit masang sen Jericho khopia hung umden unlang akikhan lhit tengle hung kile kit tauvin,” tin thu ahiltai. Ajeh chu amahohin alimsou chu ajachatpi mong mong u ahi. <sup>6</sup> Chujouvin Ammon miten echangeija David chu asuh lunghang u akihet doh phat’uvin, Ammon mite akihou toh- uvin Bethrehob a cheng Syria mite leh Zobah a cheng Syria mite tol’a panga galsat sepai sang som ni thalah dingle, Maacah lengpa le amite sang khat thalah ding chule Tob mite sang som le sang ni thalah ding in mi asol tauve. <sup>7</sup> Hiche thusoh David lengpan ajah doh phat’in lamkai Job le asepaite mi hat chengse chu abonchavuin gal boldin asoltai. <sup>8</sup> Chuin Ammon mite chu ahung kitoldoh’uvin kelkot phunga chun galsat din akigol tauve; chule Arameans mite Zobah le Rehob khoa kon leh Tob le Maacah mite chu mun onglan laiah akigol taovin ahi. <sup>9</sup> Job chun amasanglam le anunglama gal miten ating tan to tai, ti amudoh phat’in, Israel lah a mi son um lhentum cheh phabep alhengdoh in, Arameans mite dou din mun onglai ah apansah

tai. <sup>10</sup> Chule mi amoh chengse chu asopipa Abishai lamkai peh din akoiyin, Abishaiyin asopite chengse chu Ammon mite toh kikat to din agol toh tai. <sup>11</sup> Chuin Joab'in aseitai, "Arameans mite hi Keima dinga ahat behseh jenguva ahileh nangman neihung kithopin lang, chule Ammon mite chu nang dinga ahatval behseh jenguva ahijongle keima hung ing ting nahung kithopin nange, ati. <sup>12</sup> Hijeh chun hangtah in hung pang uvin lang, imiteu ding leh i-Pathen'u khopin jouse din pasal jouse chu hatah in pangu hitin; chule Pakaiyin lungdei chu guilhung taken,"ati. <sup>13</sup> Hiti hin Joab le ama toh pang khom sepaiho chun Arameans mite chu asat pan un ahileh; Arameans mite chu ajamchek gam tauvin ahi. <sup>14</sup> Arameans mite jam chu Ammon miten jong amudoh phat'ugin amaho jong chutobangma chun Abishai masanga ajam uvin akhopin sunga alhailut tauvin ahi. Hichun Ammon mite toh akikat nao vakon in Jo'ab jong Jerusalema ahung kile kit tan ahi. <sup>15</sup> Hichun Arameans miten Israel chate toh kidinte joulou ding ahin chu ahin kihetdoh phat un ahung kithah gopkhom kit uvin, <sup>16</sup> Hadadezer kitipan asol in Euphrates luipi gal a cheng Arameans mite aga kousah in ahileh, amaho jong Hadadezer sepai lamkaipa Shobach lamkai nan Helam geiyin ahung kitol'ugin Arameans mite ahinjop kit un ahi. <sup>17</sup> Chuin David in hitabang thil umchan chu ajah phat in, aman jong Israel chate pumpi akhohom khom soh keyin chule Jordan ahung galkaiyin Helam channah a sepai te ahin puilhung tan ahi. Hichun Arameans mite jong David lengpa dou

din achamtah un anapang uvin akisatpi tauve. <sup>18</sup> Ahinlah Arameans mite chu Israel te masanga ajam kit tauvin ahi. hichea hin David sepai ten Arameans sepai sakol them ho mi jasagi le tol'a pang sepai sangsomli chule agal lamkaipau Shobach kitipa jaonan atthat taovin ahi. <sup>19</sup> Chuin Lengte jousen Hadadezer toh akitho vang uva Israel te ajolou u amudoh phat un, Israel mite khut ah akipelut un amaho noijah aum taovin ahi. hichejou a pet chun Arameans mite chun Ammon mite kithopi ding chu akicha taovin ahi.

## 11

### *David Le Bathsheba*

<sup>1</sup> Chavang laile chonna ngai dan a anaum leng ho galkon phat laiyn David jong chun Joab le asepaite toh Israel chate abonchan galkon din asoltai; amaho jong acheuvin Ammon sepaite agasumang un, chule Rabbah kho aga umtauve. Ahin David vang chu Jerusalem khopia aumden jing nai. ✧ <sup>2</sup> Nikhat hi nilhah lam ni kihei don hin David jong asunchol na jalkhun'a konin athou doh in leng Inpi inchunga chun avah len ahileh, inchunga kon chun numei melhoi khat akisil pet tah amun ahi. <sup>3</sup> Hijeh chun David'in mi asol in numeinu chu koi ham, tin agadoh le sah tai. Hichea hin mi khat chun, "Hiche nu hi Eliam chanu, Hittite mipa Uriah jinu Bathsheba chu ahi" tin aseipih tai. <sup>4</sup> Hichun David'in mi sottol le ho asol in amanu chu aga puisah in, Bathsheba jong chu leng inpi sung ahung lut'in, chuin David

---

✧ 11:1 1 Thusimbu 20:1



chun amanu chu aluppi tan ahi. Hichepet a hi Bathsheba chu athi neijou akisuh theng jou chabou ahi; akichaiyin amanu jong a inlama achetai. <sup>5</sup> Phat chomkhat jouvin Bathsheban nao avop ahin kihetdoh phat'in aman David koma hitin thu athot in, "Keiman nao kavoptai," ati. <sup>6</sup> Hichun David in Joab chu thu athot in: "Uriah kitipa Hittite mipa chu kahenga hinsol temin," ati. Hijeh chun Joab in jong Uriah chu David lengpa hengah ahinsol tan ahi. <sup>7</sup> Chuin Uriah chu David kom ahung lhun phat'in, David'in jong Joab umchan chule mipi itobang banga um uva chule agal sat u machal jing hinam tin adongin ahi. <sup>8</sup> Chujouvin David in Uriah koma aseitai, 'Na-in lama nomin chesuh tan, Hijeh chun Uriah jong leng inpi adalhan achesuh tai, chuin leng ipi adalhah chun anunga chun lengpa insunga konin thilpeh ding khat ahin choi peh pai paiyuvin ahi. <sup>9</sup> Ahivangin Uriah chu inlang achipon, lengpa kotpi phung bula kotkhah ngah ho toh chun hiche jan chun alum den tan ahi. <sup>10</sup> Hichun David in Uriah a inlam achilou ahin hetdoh phat chun, akou in epi jeh ham ti adong tan ahi, "Kholgama kona hung lhung nahilou ham, ibola na in lama chelouva naum ham?" tin aseitai. <sup>11</sup> Hichun Uriah'in David koma aseijin, "Pathen thingkong le Israel chate chule Judah mite lhambuh jenga cheng ahiuvin, kapu sepaite kapupa Joab le asepaite jong tollhang lah a ngahmun mai maiya cheng ahiuve; ipi dinga keima in'a kachea kadu du kaneh a atui tui kadona kajinu angunga nomtah a kalup ding ham? Nangma damlai sung le nahinkho phatlai

sungsen keiman hitobang kinopsah na thil hi bol ponge,' tin aseiyé. <sup>12</sup> Chuphat'in David chun Uriah koma aseijin, “aphai tuni jong hikoma umtan, jing tengle navaikon doh sah nange,” atitai. Hijeh chun Uriah jong chuchi nikho le ajing nikho chun Jerusalema anichongtai ahi. <sup>13</sup> Chuin David'in Uriah chu, ama koma an ne dingle lengpitwi don dingin akou vin; chuin ama chu lengpitwi adon kham sah tai; chuchi jou jeng injong a inlam ma ajinu kom chidin asol doh jou dehpon, nilhah lamin Uriah chu kelkot ngah sepaite chutoh lumkhom din ajalkhun akijot kit tan ahi.

### *Uriah Thina Ding David In Agon*

<sup>14</sup> Chuin Ajing jingkah chun David'in Joab lekha khat athot in hichu Uriah khut'a agah thot'e. <sup>15</sup> Lekha sunga hin David chun hitin asune, “Uriah hi gal kisasna ahah lai laiya amasan pansah uvin lang chutengle gal miten atha teitei nadin ama achangseh'in dalhauvin,” tin asune. <sup>16</sup> Hijeh chun Joab injong khopi khat aum phat'in mihat tah tah panmun ahi, tia ahetsa bangkom laitah a chun Uriah chu apansah tan ahi. <sup>17</sup> Chuin khopi sunga sepaite ahung kondoh uvin Joab chutoh akisat tauvin ahi; chule hichemun a chun Hittite mi Uriah jaonan mipi lah a David sepaite phabep jong atahat tauvin ahi. <sup>18</sup> Hichun Joab'in jong mi asol in gal kisas umchan jouse chu David koma aga lhutsah tai. <sup>19</sup> Hichun asottolle mipa chu ahilchah masan, “Lengpa koma chu gal kisas thusim aboncha nasei soh kei ding ahi, ati.

20 Ahin Ijem tia lengpa alung han jeng tah a nangkoma, ‘Ibola chutobang a chu khopi nanai lut jenguva kisas pi dinga nacheuba ham? Kulpi bang dunga kona nahin kap jeng diu nahet louvu ham?’ 21 Chule Gideon chapa Abimelech chu koi tha ham? Bangvuma kona numei khat’in sumhei song ahinlah sah leh alhah khum khah a hijeh a chu Thebez kiti laiya chu thiden hilou ham? Ibola hitobang tah a chu bang nanai lut jengu ham?’ tia aseih leh; nangman, ‘Nasohpa Hittite mi Uriah jong athi tai,’ tia na seipeh ding ahi,” tin ahil’e. ✧ 22 Hichun sottolle pachu Jerusalem ahungin David koma Joab in asol lo na jouse chu abonchan ahilsoh kei tan ahi. 23 Hichun sottolle pa chun David hengah hitin aseiyeh, “Gal miten keiho eihin joujo tauvin, keiho dou nan tollhanga ahung kitol doh jenguve; ahivangin keihon jong kelkot phung lam chan in kaledel lut kit’uvin ahi. 24 Chuin galmi thalpi kap them hon banga konin nasohte lengpa sepai phabep jong ahinkap lih taovin, chule nasohpa Uriah jeng jong athitai,’ ati. 25 Hichun David jong chun sottolle pa koma chun aseiyin, “Nangman Joab koma hitia hi nasei ding ahi; Hiche thilsoh jeh hin nangma lunglhada’i hih in, ajeh chu chemjamin khat khat’a abantan tan ahitai; aban teng natha hatsah jon lang khopi chu delkhumin, tin seipeh in, hiti chun Joab chu atilkhon tan,’ ahi. 26 Chuin Uriah jinun ajipa Uriah chu athitai, ti ajah doh phat in ajipa dingin akap’in apul adoutan ahi. 27 Amanu pul douna phat akichai’in David’in mi asolin amanu chu leng inpi sungah

---

✧ 11:21 Thutan Vaihom Ho 9:53

agapui lutsah tai, chule Bathsheba in David chu chapa khat ahinpeh tai. hinla David thilbol achonna chungah Pakai alung lhai tapoi ahi.

## 12

### *Nathan Themgaopan David Aposal*

<sup>1</sup> Hiti chun Nathan themgaopa chu Pakaiyin David komah asol tan ahi: Hichun Nathanin jong David koma hitin aga seiye, “Khopi sung khat’a hin pasal ni acheng lhonin, khatpa chu mihao ahin, khat jopa vang chu mivaicha ahi. ☆ <sup>2</sup> Hichun mihaopa hin kelngoihon tamtah le bonghon tampi aneyin ahi. <sup>3</sup> Ahin mivaichapa vang chun imacha aneipoi, ahin aman alel lel a akichoh kelngoipi khat seh seh bou aneieye. Hijongle aman akelngoipi chu akivah vah-in achate toh phate chan avah in ahi; kelngoipi hin ama changlhah aneh ding an jong anejin, adon ding twi jong ama khon sunga konin adon ji'e; chutengle a-angsunga alum jin, achanu tobang bangin aumtan ahi. <sup>4</sup> Hichelai hin kholjin mikhat mihaopa koma chun ahung lhung in ahileh, hiche kholjinpa thapeh ding chun mihaopan jong ama kelngoi hon lah a khattou thapeh ding jong a-ittan, chule ama bonghon lah a kona khattou thapeh ding jong a-it tai; ahin mivaichapa kelngoipi khat sheh anei chu aman in akoma hung kholjin pa ding chun atha peh tan ahi,” ati. <sup>5</sup> Chutah chun David jong alung hangjah jengin hiche mihaopa douna chun Nathan themgao koma chun hitin aseitai, “Pakai hing jing mina

kasei ahi, hitobanga kisa chonvalpa chu thi dinga kilom mong ahibouve! <sup>6</sup> Chujongle aman voujang natna beihela hitobang thilpi hi abol jeh hin aman kelngoipi chu ajat li'a asah kit ding ahi,' atitai. <sup>7</sup> Chuin Nathan themgaopan David koma aseipai jengin, "Hichea kisei mihaopa hi nangma nahi, Pakai Israel Pathenin hitin aseieye, 'Nang hi keiman Israel chate chungang leng chang dinga thao kanusa nahin, chule Saul thaneina a kon kanahuhdoh nahiye. <sup>8</sup> Chujongle napupa Saul'in, ajiteu jouse chule Israel insung pumpi le Judah insung pumpi jong kapeh nahi; hicheng jong hi alhom behseh na laiya ahileh tamtah kapehbe ding nahi nalaiye. <sup>9</sup> Chuti ahileh epi dinga nangman Pakai thusei nanot thap a hitabang tijat umtah thil hi nabol hitam? Nangman Hittite mipa Uriah chu nadengin Ammon mite chemjamin nathat nin, chule ajinu jong naji din nakipui jeng theiye. <sup>10</sup> Hijeh a chu tua hi nangma insunga kona jong chemjam lang jing jeng ding ahi. ajeh chu nangin keima nahsah mon neibolin, Hittite mipa Uriah jinu chu naji din nakipuitai,' tin aseieye. <sup>11</sup> Chuin Pakaiyin hitin aseieye, ajeh chu nangman nathil bol banga, keiman nangma insunga kona nadou ding thilse kahin kondoh sah ding ahi. chule namitmu changtah a najite jeng jong kalah peh a naheng nakom mite kapeh doh ding, chule amahon japi mitmu lai jenga jong najite chu aluppi dingu ahi. ✧ <sup>12</sup> Ijeh inem itileh nangman nathil bol chu guhthima nabol ahin, keiman vang Israel chate pumpi mitmu dinga kabol ding ahi,' tin aseieye."

---

✧ **12:11** 2 Samuel 16:22

### *David In A-Chonset Aphon*

<sup>13</sup> Chutah chun David in jong Nathan koma hitin aseiyee, “Keima Pakai dounan kachonsetai,” atin ahileh; Nathan jong chun David koma aseipaiyin, “Pakaiyin nachonset angaidam tai. hijeh a chu hiche chonset jeh in nangma thi tapon nate. <sup>14</sup> Hijongle nangin hiche thil hi nabol a Pakai chu nahsah mo tah a nabol a nataitom ahitan, hijeh a chu ahung peng ding nacha chu thitei tei ding ahi tai,” tin aseitai. <sup>15</sup> Hichun Nathan ainlama achijou chun. Pakaiyin Uriah jinu hin David chapa chu gotna apen ahileh naosen chu apet petin adammo pai tan ahi. <sup>16</sup> Hijeh chun David jong naosen adamna din Pakai henga atao tao tan ahi; David chun an angolin apotdoh in, jan khovah hel chun tollhanga alumin ahi. <sup>17</sup> Chuphat’in ainsung mi upa chengsen ajol jol jenguvin chule tollhanga alupnaa kona tho doh sah tei din agouve; ahinla David chu akithou doh deh pon, chule an jong aneh pi deh pouve. <sup>18</sup> Ahivangin nisagi lhin nin naosen chu athi tan ahi. Hichun naosen chu athitai’ tia David koma sei peh ding asohte chu akicha tauve; ajeh chu amaho geldola, vetan, naosen ahinlaiya bon eiho thusei angai louva ahileh, tua naosen athitai, tia iti iseidoh ngam diu ham? Amale ama kithalo mai ding ahi,” tia angaitou ahiye. <sup>19</sup> Ahin David chun asohte chu akhoisa cheh tauve ti ahetdoh phat’in naosen chu athi ahitai tin David’in ahedoh pai paitan ahi; hijeh chun David chun asohte chu adong in, “Naosen chu athia hitam?” atileh amahon jong, “Athitai,’ atiuve. <sup>20</sup> Chuphat’in David jong tol’a

alupna a konin ahung thou dohin akisil ngim in, thao akinun, aponsil akhel'in, Pakai houin sunga avah lut'in chibai agaboh-e; chujouvin David chu ama inlama ahung in an athum in amahon jong ankong aluipeh-uva ahileh, an anetan ahi. <sup>21</sup> Hichun asohten ajah a aseiyuve, "Ipibola hitia hi naum ham? naosen ahai hai pet in an nangol in nakap kap jengin, naosen athi tah bah phat in nathou doh in an nane jenge,' atiuve. <sup>22</sup> Hichun David in jong hitin adonbut'e, "Naosen ahinpet a chu an kangola kaka ka ahin, "Kon ija ahethi ham, ajo le Pakaiyin eilungset a naosen hi ahin hin sah thei ahi?" tia keiman kagel jeh ahi. <sup>23</sup> Ahin tun vang ama athia ahitan ibola an kangol ngol nah lai ding ham? ken ama chu kahinsah theiya nabol'uham? keibou ama koma nikhat le kache ding ahin, ama chu kahenga hung kile kit louhel ding ahitai," ati. <sup>24</sup> Hichun David'in ajinu Bathsheba alhem lung mongin akoma aga lut kit'in aluppin ahileh amanun nao ahinvop in chapa khat ahing kit'e; Chule David in amin Solomon asah in ahi. Pakaiyin amahi angailui. <sup>25</sup> Hijeh chun Nathan themgaopa henga ahin hetsah in ahileh Nathanin Pakai thusei dungjuiyin ama chu amin Jedidiah tinjong aminvo kit'e, (hichu Pakaiyin angailut tina ahi).

### *David In Rabbah Kho Alah*

<sup>26</sup> Chuin Joab chun Ammon mite khopi lanlung Rabbah chu adel khumin gal'in akisat pin ahileh ajouvin leng khopi chu alatan ahi. <sup>27</sup> Chuin Joab chun David koma sottolle miho asol'in agasei sah tai, "Keiman Rabbah kaga kisat pin,

twiphai khopi chu kajoutai tin. <sup>28</sup> Hijeh chun tun mipi amoh cheng khom tup'in lang khopi dounan ngahmun hung sem tan, chule akhopi jong hung toupaha jengin, achuti louva ahileh keiman akhopi hi kalah a keima min kaputsah ding ahi tai," ati. <sup>29</sup> Hijeh chun David in mipi abonchan akhom soh keyiin Rabbah khopi lama achen, chule akhopi dou nan gal abol'in akisat pin ahileh ajouvin akhopi chu alatan ahi. <sup>30</sup> Chule alengpau lallukhuh chu David in aluchanga konin alahdoh peh in chule amalu changah akikoi tan ahi. alallukhuh chu sana le songman tam a kistem chule agih dan chu pound somsagi le nga ahi. chujongle asunga chun song mantam tah akikoiiyin. Chujongleh David chun Rabbah khopia thil thang tamtah ahin chom doh in ahi. <sup>31</sup> Chujongle akhopi sunga cheng mipi jouse chu gal hing-in akaiyin, chule thing-at dingle tuphul kheng dingle, heicha kheng dingin agoiyin, chule cheh dengin apansah tai. Hitichun David chun hitobanga hi Ammon mite khopi jouse anabol ahi; chujouvin David le mipi chu abonchauvin Jerusalema ahung kile kit tauvin ahi.

## 13

### *Ammon In Tamar Ajonpi*

<sup>1</sup> Chuin David chapa Absalom chun sopi numei hoi tah khat aneiyin, amin chu Tamar akiti; hiti chun phat chom khat jouvin David chapa Ammonin Tamar chu ahin deicha lleh tan ahi. <sup>2</sup> Amnon chun Tamar chu adeicha lleh jeng tan ahileh hinkho man ding dan jong ahethei tapon,



hichun achainan Tamar adeichat behset jeh in adam mo lotan ahi; Ijeh inem itileh Tamar chu nungah thengsel ahina laiyyin, chule Amnon in amanu chu kachan joulou ding hitam tin alungin agel tan ahi. <sup>3</sup> Ahivangin Amnon hin kilopi loi lungthim suhto je themtah khat anei in, amin jong Jonadab akiti; amapa hi David loipa Shimea chapa ahi. <sup>4</sup> Nikhat Jonadab in Amnon koma aseiyin, “Ipi bola lengpa chapa jingkah seh le mi-ngol ho um banga umjing nahim? Ipi ham nabuina?” atileh; Amnon in jong aseipeh tai, “Keiman kasopi pa Absalom naonu Tamar khu kadei chat jeh ahi,” tin aphong doh tan ahi. <sup>5</sup> Chuphat’in Jonadab chun aphai, “keiman epi nabol ding naseipih nange ati. Nungchin lang Nalupna a khun lumin lang kinat lhem sah in. Napa chu nangma ve dinga ahung tengleh napa koma hitin seiyin, Tamar chu ahunga nangma dia an neh themkhat nahung bolpilh din thum’in. chule aman namitmu a akhut tah a nahung vah’a ahileh nangma naol chom din jong seipih tan ati.” <sup>6</sup> Hichun Amnon in jong aseipeh bang bang chun alup nah a alumin akinat lhem sah tai. chuin lengpa chu ave din ahungtan ahileh Amnon chun lengpa koma chun aseipeh tai,” Lungset tah in kanaonu Tamar chu neihin solpeh inlang keima mitmun kadutah khat nehding eihung sempih hen, chutile ken ama khutsoh mong mong chu nenge,” ati tai. <sup>7</sup> Hijeh chun David jong anom in Tamar chu Amnon’s in a agachi a anneh ding them khat agasem peh din asol tan ahi. <sup>8</sup> Chuphat’in Tamar jong Amnon in’a achen alhun phat in, alupna lang a ache lut

tai. Hichun changboi goina alan changbong agoiyin, Amnon mitmu tah in changlhah chu asem'in akan peh tai. <sup>9</sup> Ahin amanun akhangbel sunga a changlhah kansa chu Amnon ang sunga agathah lutpeh vang'in amapan ane deh tapon ahi. Hichun Amnon'in asohte kommah aseiyin, "Kakoma konin nabon un potdoh'un," ati. Hijeh chun abonchao vin ama koma konin apotdoh soh kei tau've. <sup>10</sup> Chutah chun Amnon in Tamar koma ase i n, "Tun an neh ding chu kalupna langah hinchoilut inlang chule neinehsah tan ati. Hichun Tamar injong anehh ding chu achoilut pih tan ahi. <sup>11</sup> Ahin amanun anehsah jing lai chun, amapan ahintuh chah kheh in chule athumtan ahi, "Hungin neihung luppin kalungset kanaonu," tin. <sup>12</sup> Chuin Tamar chu akap in "Ahipoi he-u, ngol hih in! hitabang pihi kema kom ah bolhah beh in! hitobang ngol hoitah thil hi Israel chate lah a kibol ngai lou ahi, ati. <sup>13</sup> Chule keiman hoilam a jum kathoh ngam ding ham? chule nang jong Israel chate lah a michavai mi-ngol khat mong mong nahi ding hita chume. Hijeh a chu katao tho ahi, lengpa koma neiki thumle chun aman jong nang ding beh a chu ajah da louhel ding ahi nai," ati. <sup>14</sup> Ahin Amnon chun amanu thusei chu a ngaipeh tapon, amanu sanga athahat joh jeh chun pum hat'in aluppi tai. <sup>15</sup> Chuin hetman louvin Amnon's lungset nachu muda najoh ahungsoh tan, chule amuda dan chu masanga adei chat na sang in akhoh jo tai ahi. Hijeh chun Amnon chun akoma hitin ase i tai, "Kithou doh loiyin lang pot doh loiyin," tin asol doh loitan ahi. <sup>16</sup> Chuin

Tamar'in kap pummin aseiyin, "Ahipoi he-u, hitobang thildih louva neisol doh loi hi neibol masat na sanga khoh cheh jo ahi," ativangin Amnonin angai peh deh tapon ahi. <sup>17</sup> Chujouvin Amnon in alhacha ho akouvin thu apetan ahi, "Hiche nu hi kamasang a konin sol doh loiyun lang anunga kotpichu kamloi un" ati. <sup>18</sup> Hitichun Amnon lhachahon Tamar chu asoldoh loiyun anunga kotpi akamden tan ahi. Tamar chun sangkhol chol hoitah aki-ah ahi; ajeh chu chuchi laikhanga chon nadan dungjui a leng chanu nungah theng hochu hitobanga chu ana kivonji mongu ahiye. <sup>19</sup> Ahinlah tun Tamar in asang khol chol chu abot tel'in chule alu jangah vutvam akiloi tan ahi. chuin akhut chu amai ah akoi in, o thong je jun akap'in achi mangtan ahi. <sup>20</sup> Hichun A-upa Absalom in ana dong in "Na sopipa Amnon chun naum khompi hiteiyin te ong? hijongle tun thipchat in umtan, ajeh chu ama jong na-upa ahi bouve. chule athilbol hi nalungthim a chinda tan," ati. Hijeh chun Tamar jong a-upa Absalom in'a chun lung genthei tah in acheng den tan ahi. <sup>21</sup> Chuin David lengpan hitobang thilsoh ho hi ajah doh phat'in alung hang lseh jeng tan ahi. <sup>22</sup> Chule Absalom in hitabong thilsoh hi Amnon koma aseidoh lou vang'in Amnon chu nasatah in avetda lseh jeng tan ahi ajeh chu anaonu chung a athilbol aumchan jeh chu ahi.

Absalom's in Amnon Chunga Phu Alah

<sup>23</sup> Hitichun kumni jouvin Absalom chun Ephriam kom a Baal-hazor khoa kelngoi mul avou in, Chule Absalom chun leng chapate jouse chu abonchan golvah a chun akou soh kei in

ahi. <sup>24</sup> Hichun Absalom jong lengpa henga achin hitin agaseiye, “ka kelngomul vou hon tunna atong un, hijeh chun lengpa le asoh te jouse jong lungset tah a nahung uva hiche nikho hi keitoh neihung man khompi diu ham? tin agasei tai. <sup>25</sup> Ahivang in lengpan Absalom adonbut’in, “Ahipoi kacha, kabon uva kahung uleh nang dinga khandel kahi diu ahi ati. Ahinla Absalom in aha tem cheh jeng in ahi, hiche jong hin David chu ache deh poi, Absalom chu aphant thei na aboh jeng vang’in. <sup>26</sup> Chuphat’in Absalomin apha khutia nang nahung thei lou ding leh eti nagel em kanaopa Amnon hinsol ding chu? Chuin lengpan ahin donbut in, epi jeh a Amnon hungding? ati. <sup>27</sup> Ahin Absalomin ase kit in Amnon le leng chapate aboncha solpeh ding lengpa anup masang in angeh ngeh jenge tan ahi. Ajeh chu Absalom kigutnahi lengte jaona dia kilomtah a kingon abol ahi. <sup>28</sup> Chujou in Absalom chun asoh teho chu thu ase peh masat in, “Amnon chu lengpi twi ahung kham ve-lhi jing jeng uvin lang, keiman najah-uva, ‘Amnon chu jep’uvin tia kahin sei tengle that jeng uvin, kicha hih hel’uvin. Ajeh chu keiman thu kapeh louva nabol u ham? Hangsan tah le thanei tah in pang uvin,” tin ase peh tai. <sup>29</sup> Hijeh chun Absalom soh ten jong Absalom in athupeh bang bang uvin Amnon chu atah taovin ahi. Chuin lengpa chapate adangho se abonchan akipat’uvin asakol pol cheh chungga atou doh soh keiyuvin ajam gamtauve. <sup>30</sup> Hichun amaho lamkim lah Jerusalem ahung gei uvin David henga thu ahung kithang lut masan, “Absalomin

lengpa chapate jouse athat game, khat'a khat cha jong ahing hoi ta poi," tin ahung ki sei e. <sup>31</sup> Chutah chun lengpa jong akipat doh paiyin aponsil jouse abottel'in tollhanga akijam tai; chuin akoma ding alhacha jousen jong tijat jeh le lungkham jeh in aponsil akibotel soh kei tao vin ahi. <sup>32</sup> Chuin David golpa Shimea chapa Jonadab chu David kom ahung in hitin ase i e, "Ahipoi tahsan hih beh in, lengpa chapate ho jouse aboncha atha ahi sam poi, Amnon chang seh kithat ahibouve; ijeh-inem itileh Absalomin hichebol ding hi masanga pet Amnonin anaonu Tamar pum hat san a abolset nikho'a pat a chu gonsa anakoi ahitai. <sup>33</sup> Ahipoi, kapu lengpa nachapate abonchauva thigam ahi poi! Amnon sehbou thi ahi," ati. <sup>34</sup> Hichephat tah chun Absalom chu ajam mang tai; chuin Jerusalem a mive lhia pangpa chun akho dah in agah vet'a ahileh, vetan, Horonaim molsang pang langa chun mihem tamtah ahung kijot'ugin ahi. tin lengpa seipih din alhai tan ahi. <sup>35</sup> Hichun Jonadab chun lengpa jaah ven! Tun leng chapate khu ahung tauve; nalhachapa keiman kasei peh bang in ahung taove," ati peh e. <sup>36</sup> Chule Jonadab chun thu ase i jou jouvin, vetan, lengpa chapate chu ahung lhung pai tauvin, chuin apeng jah'ugin akap cheh tauvin ahileh, lengpa le alhacha ho jong abonchauvin lhase tah-in akap soh kei uve. <sup>37</sup> Chuin David in nisotpi achapa Amnon pul adouvin ahi. Absalom vang chu apupa Geshur lengpa Ammihud chapa Talmai

koma ajam tan ahi. ☆ 38 Hitichun Absalom Geshur gamah kumthum sungin aga um tan ahi. 39 Chule tun leng David injong Amnon thi chung changa kicham na nei a, achapa Absalom toh kithah gopkhom kit ding chu angaicha lseh tan ahi.

## 14

### *Absalom Kinungle Kitna Dinga Joab Tohgon*

1 Chuin lengpan Absalom hi angai cha lseh jeng taiti Zeruah chapa Joab hin ahin hetdoh tan ahi. 2 Joab hin mi asolin Tekoa khosunga mi numei chingtah khat aga hol doh sah in, amanu koma chun aseï tai, “Nangma tun lunghem a pul dou dou jeng tobang’in kistem in, pul douna ponsil ksil’in lang, thao jeng jong kinu dan, ajeh chu phat sot tah sunga thi op’a um numei pul dou dou jeng bangin um’in ati. 3 Chutengle lengpa koma ga chelut’inlang, ajah a hitin ga sei in, “ati, Joab chun aseï ding thu jouse abonchan amanu chu athu mop tai. 4 Tekoa khosunga numeinu chu lengpa koma ahung phat’in abohkhup in tol’a amai asulut in jana ape tai, chule aman aseiyin, “Vo lengpa, nei pan pin,” ati. 5 Hichun lengpan jong adong in, “Na gentheina ipi pen ham?” atileh, amanun adonbut’in, O kaden, keima meithainu kahi, kaji pa athia ahitai ati. 6 Chule nasoh nu kei hin chapa ni kaneiyin, amani chu lou jaova ahung kibao lhonin akina lhone; hichun amani phel khen ding mihem khat cha anaum lou jeh in khatpan khatjoh

---

☆ 13:37 2 Samuel 3:3

pachu ajep'in atthat pai tai. <sup>7</sup> Hijeh chun tun vetan, insung pumpi ahung kon uvin nasoh nu hi eidel khum'ugin hitin aseu uve, Asopipa that pachu hinlha doh loiyin, aman asopi pa atthat in ahinkho khel a keihon ama katha diu ahi,' tin aseiyuve; hitobang hin amahon ama chilhah jong asuh bei teidiu dol ahitai. Hitia hi amahon keima mei-am jeng jong achen mit uva hiche leiset chung a kaji pa min asuh mang diu, achi khai ding jong aumsah lou diu ahitai," ati. <sup>8</sup> Chuphat'in lengpan jong numei nu koma chun hitin aseiyue, "keima boldin dalhan lang, Na'in lama chen, keiman anavesui tange koiman atohkhah lou nadin,' tin asol tai. <sup>9</sup> Chuin Tekoa khoa hung kon numeinu chun lengpa koma chun hitin aseu kit'e, kakipah e, kapu lengpa chule "Kapu lengpa chu keima eikithopi jeh a nahin seiset khah uleh themmona chu keima le ka inkote chung a chujo hen, lengpa le alaltou na vang themmona beiyin umjo hen,' tin aseiyue. <sup>10</sup> Chuin lengpan aseu kit in, "Mihem khat touvin nakoma thu aseu kit'a ahileh ama chu kei koma hin pui jeng in, ama chun nang ma natham khah kit louhel ding ahi,' ati peh e. <sup>11</sup> Hichun amanun jong aseu kit in, "Lungset tah in Pakai na Pathen henga nei taopeh teitei in, chutia chu thisan phu lanom pan mi atha kit louva, kachapa atha louna din,' atileh; lengpan jong aseipeh-in, "Pakai hing jing mina kasei ahi, nachapa chu asamjang khat jeng cha jong kisubui lou ding ahi,' ati tai. <sup>12</sup> Hichun numei nun aseu kit'in, "Lungset tah-in nasohnu kei hi kapu lengpa koma thu cheng khat beh neisei sah thei kit

ding ham,' atia ahileh; lengpan jong, "Seiyin seiyin," ati. <sup>13</sup> Hichun numei nun aseï in, "Chuti ahileh ipi dinga nangman Pathen mite douna a hitobang thilgon hi nanei ham? Ijeh-inem itileh lengpan hitobanga thutanna naneiya kon hin lengpan nadel mangpa inlama napuilit loujeh-in nathu tan hi nangma chungma ma a nakitan ahi tai ati. <sup>14</sup> Ajeh chu eiho Ibon chauva athi cheh ding Ihiu've, chule Ibon chauva tol'a twi kisung lha kinung thaldoh kit thei lou tobang ihuvin ahi, Pathen in jong mithi long damsa chu phong doh kit deh tapon te; chule lengpa chun ama toh ekikhan teng ule ama toh ihung eumkhom theikit nadiu aneijin ahi. <sup>15</sup> Chule keima hiche thuseiya hi kapu lengpa heng hung kahi, ipijeh-inem itileh mipi hin keima eitijat sah tauvin chuphat'a nasohnu ken jong hitia hi kagela, 'Keiman lengpa koma gasei tange, ijem itileh lengpan asohnu kei thuseihi ngai jeng khat nan'te <sup>16</sup> Chule lengpan jong eisumang ding miho khut'a eihuh doh tei ding ahi, Pathen mite lah a ei suhmang sah lou ding ahi.' <sup>17</sup> Henge, kapu lengpan lungthim chamna eihin pih kit diu ahi. chule keiman kahlen nangma hi thilpha thilse hekhen dola Pathen vantil tabang nahi. Pakai na-Pathenin napanpi jing hen," ati. ✧ <sup>18</sup> Hichun lengpan jong numeinu chu adonbut'in, "Keiman kadoh doh chu ipi hijong le imlou hellin neihin seipi in ati. Hichun numeinun jong aseiyin, "Kapu lengpan na seinom nom sei jengin,' atitai. <sup>19</sup> Hichun lengpan adong in, "Thil hijatpi

---

✧ **14:17** 2 Samuel 19:27



nasei na a hi nangma Joab chutoh kihoutoh a kikhut jop nahim?" atileh; numeinu jong chun adonbut'in, "Kapu lengpa, eti kem kaseilep ding ham? Koima chan nangma kommah emacha sel thei ponte. Henge, Joab in eihinsol a chule thu hijat pi hi aman nasohnu keima hi eithumop'a ka kamsung'a eikhumpeh ahinai ati. <sup>20</sup> Nalhacha Joab chun nalung nakhel a thil kigon dol jouse nakhel doh ding gelkhoh na a hiche hi abol anahi. Ahoi chu hita leh kapu nangma hi leiset chung a um thil ijakai hetna dol a na chih dan mong mong Pathen Vantil chihna tobang bang a hi bou've," atin ahi. <sup>21</sup> Chutah chun lengpan jong Joab koma ase in asol tan ahi, aphai tun chinlang golhangpa Absalom chu ga nung pui lut tan," ati. <sup>22</sup> Chuin Joab jong chu tol'a abohkhup in, jana apen, lengpa phatthei aboh in, hiti hin Joab chun ase tai, "Tuni hin kapu lengpa mitmun lungset na kachang mong mong e, ti na soh pa thil ngeh khoh pen hi nanop peh jenge,' ati. <sup>23</sup> Chuin Joab jong akipat doh paiyin Geshur gam'a achen Absalom chu Jerusalem a ahin lepui tai. <sup>24</sup> Ahin lengpan hitin thupeh aneiye, "Absalom hi ama insunga chimei thei ahi, ahin keima angunga vang hung vah lut thei louhel ding ahi," ati. Hijeh chun Absalom in lengpa cu amutapon ahi.

### *David Le Absalom Kicham*

<sup>25</sup> Tun Israel chate lah a Absalom tobanga amel hoi jeh a seiphat thei dang koima cha anaum poi; Absalom hi akeng khotal juma pat alujang gei a achunga nolna ding imacha beihel ahi. <sup>26</sup> Alujang sam chu kumkhat a khatvei

bou ache ji ahi chule ajeh chu agih behseh jijeh ahi. hitia hi asam akivoa thil te naa atea ahileh, asam jeng jong chu shekel ja ni cheng agih jin ahi. <sup>27</sup> Absalom hin chapa thum ahing in, chule chanu khat jong ahing in, achanu min chu Tamar akiti; Tamar jong hi numei hoi tah khatma ahi. <sup>28</sup> Hiti hin Absalom hi kum ni lhingset Jerusalema acheng ahin, hijongle lengpa ang sungah khatvei cha avah lut kha hih beh in ahi. <sup>29</sup> Chuin Absalom chun Joab kou dingin mi asol'in, ahunga ahileh lengpa koma sol din agon; ahinla Joab chu Absalom koma ahung tapon ahi. Hichun Joab in mi asol kit'in, ahi vang'in Joab chu ahung deh kit poi. <sup>30</sup> Chuphat'in aman jong asoh te koma ase in, "Veuv in, Joab lou khu keima lou ban tah ahin, cheuv in lang alou laiya khu mei in gahal vam tauvin," ati. Hijeh chun Absalom soh ten jong Joab lou chu meiy in agahal vam tao vin ahi. <sup>31</sup> Chuphat'in Joab jong akip at doh in Absalom koma achen akoma hit in ase iye, "Ipi ding a nasoh ten kalou meiya ahal vam jeng u hitam?" aga tie. <sup>32</sup> Hichun Ab'salom jong chun Joab chu adonbut'in, "Vetan, keiman nahenga thu kahin thot jin, 'Hikoma hung in keiman lengpa koma nasol ing ting, "Ipi ding pen tah a keima hi Geshur gam'a kona hung khoh khoh a kahiya, kei ding a Geshur gam'a umden chu nomjo ding a?" tin ase iye, tia gadoh sah ding kati nahi. Tujengin jong lengpa ang sunga neilut sah mong mong in lang keiman themmona kaneiya ahijong leh aman eithat jeng hen,' ati tia ga sei sah ding kati ahi," ati. <sup>33</sup> Hijeh chun Joab jong lengpa koma

achen aga seipeh tan ahileh, hichun lengpan jong Absalom chu akoutai. Chuin Absalom jong lengpa koma ahungin, lengpa angunga chun abohkhup in amai tol'a asulut in jana apen ahi; chuin lengpan jong Absalom chu achop tai.

## 15

### *Absalom Phatlou Na*

<sup>1</sup> Hiti ho jouse kichai nung hin Absalom chun kangtalai khat akisem'in, sakol akai ding ho jong akigot tohsoh keyin, chule amasanga lhaidin pasal cheh mi som nga akilhen doh tai. <sup>2</sup> Absalom hi jingkahseh jingpi tah in athou jin, kelkot lampi geiya chun ading jin ahi; hitichun mihem khat tou lengpa koma mi hehna ding thu aneiyu, athu tan sah ding ahung teng le, hitobang miho chu Absalomin akou jin ana dong ji'e, "Hoilai khopi pen a kona hung nahim?" tia adoh le mihem pan jong, aphung min aseipih ding ahi. <sup>3</sup> Hiteng chule Absalom in aseipeh kitjin, "nangman chungthu nasatah nahinpolut e! chule hichehi aphoto lhez jenge lengpan hichu ngaidin koima aneipon ahi. <sup>4</sup> Chujongleh Absalom chun aseipeh kit in, "O kadeh, keima hi gamsunga thutan vaihoma pang ana hileng, mijousen achungthu u keikommatan dia ahin pohlut diu, chule keiman thudihtah a katan pih diu ahi ati. <sup>5</sup> Hitia chu ama angunga bohkhup dia mi ahung teng le Absalom chu anomji pon hisang chun aman hitobang miho chu akhut'in atuh chah jeng jin, achop jin ahi. <sup>6</sup> Hitobang hin lengpa koma athu kikhola kitan sah dinga hung ji Israel mi tapou chu Absalomin anabol

jing jin ahi; hiche a kon hin Absalomin Israel mipi jouse lungthim abonchan athu nun soh hel tai. <sup>7</sup> Chule kumli alhin jouvin Absalomin lengpa koma chun aseiyin, “Lungset tah in neisol’in lang keima Hebron khopia khun cheng ting Pakaiya kilhaina gasem ingting chule keiman ama toh kitepna kasem chu gabulhit tange ati.. <sup>8</sup> Ijeh-inem itileh nalhachapa keima Aram gamsung Geshur a kachen lai chun kitepna khat kan-abol’in hitin kana seiye, ‘Pakaiyin Jerusalema einung puilut kit poupouva ahileh keiman Pakai koma kilhaina kabola chibai kaboh ding ahi,’ tin kanaseiye,” ati. <sup>9</sup> Hichun lengpan jong aseipeh in, “aphai, chinlang nakitep nachu gamolso tan ati,” ati. Hijeh chun Absalom jong akipat doh pai in Hebron ache tai. <sup>10</sup> Ahinla Absalom chun guhthim chan Israel phung jouse koma sot tol le miho ana sola hitia hi ana sei sa ahi, “Nang hon saki pengkul kimut ging najah poupou uva ahileh, ‘Hebron khopia Absalom aleng chang tai,’ tia na sei diu ahi,” tin ana hil masa tan ahi. <sup>11</sup> Mihem jani Jerusalem khopia konin Absalom chutoh akilhon’uvin, ahin amaho chun Absalom lunggel ngaito emacha ahepou vin ahi. <sup>12</sup> Absalomin kilhaina gantha ima abol laiyn, Gilon mi Ahithophel kitipa, David dinga lungthima kithopi phatah mipa chun mi asol’in achenna Giloh khopia konin aga kousah tai. Chule Absalom in thilse abol’a lengpa adouna chu akhang tul tul jeng in, mipin jong Absalom ajop bebe jeng tau’ve.

*Jerusalem Akon David Akiseldoh*

<sup>13</sup> Hijeh chun sot tolle mi khat chu David koma ahung in hitin ahung seiye, “Israel miten alungthim’uvin Absalom nung ajui gamtauve,” ati. <sup>14</sup> Chuphat’in David jong chun Jerusalem khopia aumkhompi amite hengah hitin aseitai, “khatveijam a ebonchaova ejam diu ahitai, akhuti louleh ivaigeidiu ahitai. Kino loi ute! Absalom ahung lhun masanga khopi sunga kon epotdoh ule, eiho ehiuvin chule Jerusalem khopi sunga jong toset akon huidoh thei ding ahi, ati. <sup>15</sup> Hichun David lengpa kithopi hon jong ama chu adonbut un, keiho nangma toh kaumjing naove, hijeh chun nangman aphapen ahi tia nagel chu bol tan atiuve. <sup>16</sup> Hijeh chun lengpa jong akipat doh pai paiyin a insung mite jouse jong anunga akitol tauve. Chule lengpan in ngah dinga thaikem numei som adalah tilou koima cha adalha pon ahi. <sup>17</sup> Hitia lengpa apot doh jeng phat’in mipin anung ajui cheh-taovin ahi; acheu chun khopi ning langa veng pam nu nung pen tah a in khat a aki ngauvin ahi. <sup>18</sup> Chule lengpa lhacha ho jousen ama akhelsoh kei uvin ahi. Gath khoa kipat’a David nung hinjui ho chu mi jagup ahuiuin amaho cheng chu lengpa vengbit a umho toh hung kilhon ahuiuin ahi. <sup>19</sup> David lengpa chu akihei in Gath mite lah a lamkai Ittai kom achun aseitan ahi, “Ipi dinga nangma keiho to nakilhon ham? Chule nangma kinunglen lang Absalom lengpa kom gaumtan, ajeh chu nangma gamchom mi nahin, among monga jong na-in a kona hikoma soh changa hung khopem nahibouve. <sup>20</sup> Chujongle nangma jania hung lhung bep’a hoilam kajot ding chule

hoilama kache ding bon kihe louva iti tunia ken nangma keiho banga kagenthei sah ding ham? Kile kit tan, chule nasopteu kipuiyin lang kile kit mong mong tan; chule Pakai in amingailut nale akitahna namusah jing hen,” ati. <sup>21</sup> Ahinla Ittai chun lengpa chu adonbut’in, “Pakai hing jing min e kapu lengpa hinlai pet’a kasei ahi, kapu lengpa chuh chuh na a thina ding mun hihen, hinna ding mun hijong le, nachi chi na a chu nasohpa kei jong kahung jeng ding ahibouve,” ati. <sup>22</sup> Chuphat’in David jong chun adonbut in, “akhuti le aphai hungun chikhom ute,” atileh; Ittai jong ache masan, amite chengse le aki lhonpi nu nao chapang jouse chutoh akitol tau’ve. <sup>23</sup> Mipi chutia akitol jeng phat’uvin gamsung pumpi chu o thong jejun akap tauve; chule lengpa jong achen Kidron lui agal kai tai, hiti hin mipi abonchauvin gamsung lam jon in akitol doh tauvin ahi. <sup>24</sup> Chule Zadok jong Levi te se se jong ahiuvin, Pathen kitepna thingkong chu ahinpu’uvin ahi; chuin mipi aboncha khopi akhokhel kah seuvin Abiathar injong pathen hengah kilhaina abollin Pathen thingkong chu tol’a a ngau’vin ahi. <sup>25</sup> Hichun lengpan jong Zadok koma chun hitin aseieye, “Pathen thingkong hi khopi sunga polut kit tan, Ajeh chu Pakayin avet’a eilungset’a ahileh eihin puikit intin, hiche thingkong le achenna mun hi eimusah kit teitei ding ahi; <sup>26</sup> Amavang Pakaiyin, ‘Nachunga kalung alhaipoi,’ tia aseiya ahileh, keima hikoma kaum jinge, aman aphatsah lam lamin eibol jeng hen,” ati. <sup>27</sup> Chule lengpan Zadok thempupa koma hitin jong aseieye, “Ven,

hichehi kalungtup ahi. nang le Abiathar chule nachapa te ni lhon Ahimaaz nangma chapa le Jonathan Abiathar chapa chutoh thipchat in khopi lam kinungle taovin. <sup>28</sup> Chule keima Jordan vadunga kana kingah ding nanghon thu neihung hetsah kah seuva kana nga nga jeng ding ahi,” ati. <sup>29</sup> Hijeh chun Zadok le Abiathar chun Pathen thingkong chu Jerusalem khopi sunga anung poh lut kit lhonin, chule khopi sunga aumden lhontan ahi. <sup>30</sup> Ahin David vang chu Olive thinglhang vum lama akaltou in, alamjot pum pumin akap peh jeng in, chule akeng keovin lam ajotin, ponlu aki khuh in ahi; chujongle akilhonpi mipi jong chun abonchauvin ponlu aki khuh soh keiyun, akitol tou paiyun, chule mipi jouse jong chu kap pum pumin lam ajot’un ahi. <sup>31</sup> Hichun mihon David koma thu guh ahung sei peh un hitin aseie uve, “Ahithophel jong leng pa doumah bol miho lah a apang in, chule Absalom toh aki thokhom e,” ahung ti peh’uve. Chuphat’in David jong chun hitin aseie, “Vo Pakai, Ahithophel lungthim ngaito jouse chu ngol nan heidoh peh tan, tia katao ahi,” ati. <sup>32</sup> Hichun Pathen kihouna mun molvum asang lai a chun David ahung kaldoh phat’in vetan, David golpa Arkite mi Hushai kitipa chu a sangkhol chol akibot tel san alu jang a leivui ak-inun David lam to din ahung e. <sup>33</sup> Hichun David jong chun Hushai koma hitin aseie, “Nangman nei kilhonpi le chun kei dinga noh phah sah na hi bep ding ahi. <sup>34</sup> Chu sang in nangma Jerusalem khopi sunga lut’in lang Absalom koma chun, ‘Vo lengpa, masang laiya napa lhacha kapan bang

chun, tunjong keima hi nangma lhachan neipan sah tan,' ga tin; chuti chun pang theile chun nangman Ahithophel kitipa lung gel ngaito chu nasuh lhah thei ding ahi. <sup>35</sup> Khosunga khu Zadok le Abiathar thempu teni chun nangma napanpi lou dinga nagel ham? Hiti hin gabol in lang, ipi pi hijongle nangman lengpa insunga kaseidoh najah chan chu Zadok le Abiathar thempu te ni koma hin sei son ji jin ati. <sup>36</sup> Chule epipi thil um hitam ti hetnadia chu achapa te ni lhon Ahimaaz le Jonathan chu ahinsol jiji ;hon ding ahi. <sup>37</sup> Hijeh chun David golpa Hushai chu Abalom Jerusalem khopi sunga ahung lut pet tah chun ama jong khopi sunga ahung lut'in ahi.

## 16

### *David Le Ziba*

<sup>1</sup> Hichun David in molsang ejat hamkhat alep nungin Mephibosheth soh pa Ziban Sangan ni apot poh ding to kikan sa le chanaglhah pheng jani, lengpi theiga boh jakhat, nipi lai theiga jat jakhat, chule lengpi twi savun bom dim set khat toh ana lamton ahi. ✧ <sup>2</sup> Hichun David lengpan Ziba chu hitin ana dong in, “Ipi dinga thil hi jatpi hi nahin poh hitam?” atileh; Ziban jong adonbut'in, “Sangan teni hi lengpa insung mite touna ding ahin, chule changlhah le nipi lai theiga hi sepai te neh ding ahin; chutengle lengpi twi hi gamthip laiya dangchah a thacholho don ding ahi,” ati. <sup>3</sup> Chuphat'in David lengpan adongpai in, “Napu tupa Mephibosheth

---

✧ 16:1 2 Samuel 9:9,10



chu hoiya ba um hitam?” atia ahileh; Ziban lengpa koma chun hitin ase i, “Vetan, ama chu tuni gei in Jerusalema aum jing nalaiye, chule keiman tunia hi kapupa Saul lenggam chu kale lah ding ahi ati. ☆ <sup>4</sup> Chuin Ziba koma chun lengpan aseikit’in, “Ven, Mephibosheth thil le nei jouse chu aboncha tua hi nang na chan ding ahitai,” atipeh-e. Chutah chun Ziban jong ase ipei jeng in, “Keiman nang kaja bol nahi, nei mu chan in kachunga lung lhai jing jengin, kapu kaleng pa,” ati.

### *Shimei In David Agaosap*

<sup>5</sup> Chule David chun Bahurim kho ahin phah phat’in Saul insung mi pasal khat ahung pot doh in, ama chu amin Shimei ahin, Gera chapa ahi; ahung pot doh in alamjot toh gaosap ahinkop in ahi. <sup>6</sup> Chujongle song alan David ahin, asepai jalamte ahin, chule ajet avei a mihat kigol ho jouse jong chu songin ase p tan ahi. <sup>7</sup> Hitichun ami gaosap pum pum in Shimei chun ase i in, “Chemang loiyin, chemang loiyin nangma thisan so hat le hindan helou mi nahi tin David henglam a chun asam tan ahi. <sup>8</sup> Pakaiyin Saul insung mite thisan chu nachunga ahinle lhunsah ahitai. Nangman ama lenggam chu nanaguh ahin, chule tuahi Pakaiyin nachapa Absalom khut a afeh doh ahitai. Nangma thisan sohat nahiyeh a , nathemmo nachu nachung mama chu ahitai ati <sup>9</sup> Chuphat’in Zeruah chapa Abishai chun lengpa koma hitin ase i, “Ipi dinga hiche uithisa hin kapu lengpa hitia agao sap sap jeng ham?

---

☆ **16:3** 2 Samuel 19:25-27

Neisol'in lang alol ga tan inge," atileh; <sup>10</sup> Lengpan jong aphoh in, "Zeruiah chapate Nangho kon nadoh beh uvem? Pakaiyin ajah a aseipih a keihi gaosap in atileh, nang koi nahija ama chu nakham ding ham ati. <sup>11</sup> Chujong le David chun Abishai le asoh te jouse koma hitin ase i, "Vetan, keima chapa mong mong in bon tha dinga eihola ahi leh, hiche Saul sopipa hin iti abolda thei ding ham! Hijeh chun don dau vin lang gao sap sah sah jeng tauvin; ajeh chu Pakaiyin bollin tia ase i peh ahi. <sup>12</sup> Ijem itileh Pakaiyin ka genthei hesoh nahi eivet peh in tin, tunia eiki gaosap najeh a Pakaiyin keima dinga thilpha eibol peh theijoh ding ahi," ati. <sup>13</sup> Chuti chun David le amite chu lampia achepeh uvin; Shimei jong chu David chutoh kigal mupeh in thinglhang jui jui'a a che peh in agao sap sap jeng e; chule amaho chun David chu song le lei vui in jong asepuvin ahi. <sup>14</sup> Chuin David lengpa le alhonpi mipi hochu abonchauvin athachol l'heh taovin hichun Jordan vadung agei un abon uvin akichol un ahi.

### *Ahithophel In Absalom Ahil*

<sup>15</sup> Chutah chun Absalom le Israel mite jouse jong chu Jerusalem a ahung uvin, Ahithophel kitipa chun Absalom ahin lhon pin ahi. <sup>16</sup> Chuin David golpa Hushai Arkit mipa chu ahung lhun lhun in Absalom koma achipei in, 'Hingsot in lengpa, lengpa hingsot in! tin ahin sam tai. <sup>17</sup> Chutah chun Absalom in jong Hushai koma chun hitin ase i, "Hitia hi na golpa David chu nabol mong ding ham? Etidan a amatoh dingkhom lou nahim? tin adong tai.

18 Ahin Hushai chun Absalom koma aseï kit'in, "Ahipoi, koi koi hijeng jong le Pakai le hiche Israel miten abonchauva alhen doh pen pen chu kei jong ama a chu kahi jeng in, ama chutoh keima kalhat khom jing ding ahibou've ati. 19 Chujong le keïman koi dang kin kabol ding ham? Lengpa chapa kin bola kapan teitei ding hilou ham? Keïman napa na kana toh bang bang a tua nangma na jong katoh ding ahi," ati tai. 20 Hichun Absalom chun Ahithophel adongin, "Nalung gel temin, ipi aban kabol ding hitam?" ati. 21 Hichun Ahithophel jong chun Absalom aseï peh in, "Napan in ngah dinga adalah athaikem ho koma khun ga lut in lang galup pin; chutileh Israel pum pin nangma hi napa dou mah lamtah a kisa nahi tai, ti hin jadoh-uvintin, chuti le amahon nangma nahin jop soh kei diu ahi," ati peh e. 22 Hichun mihon Absalom dingin inchungah pon buh ason peh'un, chuin Absalom chu Israel mite pumpi mitmu lai tah in apa thaikem ho koma alut jengin aluppi tan ahi. ☆ 23 Hiche lai a Ahithophel kitipan mi athumop tapou chu Pathen kamcheng tah a hungsoh banga anagel u ahi hitobang jeh a hi Absalom in Ahithophel thumop chu David in anabol banga anajui ahi.

## 17

1 Tun Ahithophel in Absalom koma hitin angeh tan ahi, "tujan ma ma David nung del pai din keïman Sepai sangsom le sangni kilhen doh inge ati. 2 Keïman David chu athachol pet

☆ 16:22 2 Samuel 12:11,12

tah le akingaiset pet tah a kaga met ding ahi. chule ama le a sepai te jouse kasuh kichat ding chuteng mijouse jammang soh ding chuteng keiman lengpa bou katha ding ahi ati. <sup>3</sup> Mipi ho vang chu abonchauva kahin puilut ding, mou thah akichen pi ding pa henga hung kipuilut banga in lam a kahin puilut ding ahibouve; chule nangman mi khat sheh bou tha dinga nahol ahin, chutengle mipi vang chu lung mong tah a umdiu ahitai,” ati. <sup>4</sup> Athusei hin Absalom alung lhai sah lseh jeng in, chule Israel chung a lamkai ho jouse jong abonchauvin alung lhaisah soh hel tan ahi.

*Hushai In Ahithophel Thumop Akimaitopi*

<sup>5</sup> Chuphat'in Absalom chun hitin aseieye, “Arkite mi Hushai chu hinpuilut uvin, aman ipi agel a aseie em, ngai u hite,” ati. <sup>6</sup> Hichun Hushai chu Absalom kom ahinpuilut taovin chu in Absalomin Ahithophel thusei chu Hushai aseipih tan ahi, chu in aman adongin, nangma lunggel epi ham? Hinsei in ahilouleh Ahithophel thumop hi ijui jing diu hytam? Ahilouleh epi nathumop nom em ati. <sup>7</sup> Hijeh chun Hushai jong chun Absalom koma chun aseipaiyin, “Tuchunga Ahithophel mi hilna hi thilpha ahipoi,” ati tai. <sup>8</sup> Hichun Hushai chun aseie be kit nalai e, “Napa ahin amite ahuiuin mihat ahi, ti nangman jong na hetsa ahi; chujong le amahohi akiphin lung hangsa ahuiuin, gamlah a anou kilah peh savompi tobang ahuiuve. Hiche tilou jong hin napa chu gal bol them tah mi ana hi kit'e; hijeh chun ama hi mipi ho toh geh khom lou hel ding ahi, ati. <sup>9</sup> Tu jenga jong achang seh

a kokhuh dung khat a kisel ham, ahilou leh mun chom dang khat a kisel ding ahitai. Chule ama ahungdoh a nahin bulu teng uleh namite themkhat chu hungthi tei ding, chuteng nasepai te chung a tijat nale kichat na hung lhung ding, chule hitia hi Absalom's mite chu akithat tai tia thu hung kithang ding ahi. <sup>10</sup> Chuteng le galhang miho alung put sakeibah kai lung put tobang jeng ho jong chu kicha a hung lung lhadaï gam diu ahi; ajeh chu napa chu mihat tah ahin, apan pi miho jong chu gal hang mi jeng ahïu've, ti hi Israel pumpin ahin hetdoh ding ahi. <sup>11</sup> Hijongle keima lunggel vang ahileh, Israel chate pumpi hi sahlam Dan gam'a apet lhanglam Beersheba gei in nangma koma hung kikhom soh kei u hen lang, twikhanglen pang a neldi jat aphah teng u leh nangma tah in mijouse chu lamkai lechun kati ahi. <sup>12</sup> Chuti hen lang hileh eihon David chu emuteng uleh, achung a ichuh cheh uva, tol'a dai twi alhah bang banga achunga ikibuh lhah cheh diua ahi. khuti henlang hile ama ahin apan pi miho jouse puma khat'a khat jeng cha jong ahingdoh umlou diu ahi. <sup>13</sup> Chule ijem tin David chu khosung dung khat'a jamlut jongleh, Israel pumpin khao kipatsoh keiyin tin, chule akhopi chu kikai manghel'intin, song hal si khat geiya jong kidalha lou ding, ahi," ati. <sup>14</sup> Chuphat'in Absalom le Israel miten abonchauvin aseiyun, "Arkite mi Hushai thumop hi Ahithophel thumop sang in apha joi," ati tau've. Ijeh-inem itileh Pakai in Absalom chung a thilse aso sah nom jeh a Ahithophel lung gel phatah chu suh lhah nadinga tohgon ananeisa ahitan ahi.

*Hushai In David Kiseldoh Dia Asepih*

<sup>15</sup> Hichun Hushai chun thempu te ni Zadok le Abiathar chu asepih in, “Hitobang hin chule hiti hin Ahithophel chun Absalom le Israel upa ho ahil chah tai; hichun keiman jong hitobang hin kahil guh kit’in ahi, atitai. <sup>16</sup> Hijeh chun tun mi sol loi lhon in lang David koma ga sei sah lhonin, ajeh chu ‘Tujan hin gamthip noi pal mun dunga ana geh hih beh in, iti nama jongle ana gal kai pai tei teiyin; achuti louva ahileh lengpa David le akilhonpi mite chu abonchauva min atha gam hel diu ahitai,’ tin ga sei sah lhon tan,” ati. <sup>17</sup> Jonathan le Ahimaaz chun En-rogel mun a chu anga jing ji lhona, soh numei khat che’a amani chu thu aga pehji ahi; chutengle amani chepai kit ji lhona David lengpa agasei peh ji ji lhon ahi; Ijeh-inem itileh amani hi khopi sung ahung lut ji lhon le apotji lhon hi koimachan amu louhel nadinga umlhon ahi. <sup>18</sup> Ahin golhang khat chun amani hi amudoh tan, hi chun golhang pachu achen Absalom koma aga sei peh tai; hijeh chun amani jong kin loi tah in ache mang loi lhonin, Bahurim khoa pasal khat insung a ahung-lut lhonin ahileh, amapa hin a in vel’a chun twikul khat aneiyeh; hijeh chun amani jong twikul sunga chun alut lhon in akisel lhon tai. <sup>19</sup> Hichun numei khat hin twikul kam sin nading khat alan, akama chun aphan, achunga chun chang aphou khumin ahileh imacha aumlam akihe doh ta pon ahi. <sup>20</sup> Hichun Absalom sepaite chu hiche in mun a numeinu kom ahung phat’uvin ama hon jong, “Ahimaaz le Jonathan chu hoi lam a um lhon tam?” tia adoh uleh, numeinun jong

ajah-uva aseï peh in, “Amani chu twidung khu galkai lhon tan te” ati peh e. Amaho chun agahol’uvin amudoh joulou phat’uvin Jerusalem lama ahung kinungle kit tau’ve. <sup>21</sup> Hichun amaho ache phat’uvin Ahimaaz leh Jonathan chu twikul sunga konin ahung pot doh lhon in, achepai pai lhonin David lengpa aga sei peh lhon tan ahi. Amani hin David koma hitin aseï lhon e, “Kipat doh loiyin lang, Jordan vadung gal kai loi tan ati; ajeh chu hitobang bang hin Ahithophel chun nang dou nan lung gel phalou lou mi ahil tai,” aga te lhon e. <sup>22</sup> Chuphat’in David jong akipat doh pai pai in, ama lhonpi mipi chutoh akilhonin Jordan vadung agal kai tau’ve; chule khovah lhah phat in Jordan vadung galkai loulai khat cha aum tapou’ve. <sup>23</sup> Ahithophel hin athumop chu koiman alah peh lou amu doh phat chun sangan chung a touna akiphan, akhopi ainlama achetai. Chuin aman ain alou agol toh soh keiyin, chujouvin amale ama akikhai lih tai. chuin mihon amahi apa lhankhuh ma man avui tau’ve. <sup>24</sup> David chu Mahanaim kiti laiya chun ahungin ahi. Absalom jong chun Jordan vadung ahinpal galkai in ama ahin Israel chate abonchauva ahïu vin ahung tau’ve. <sup>25</sup> Absalom hin Joab khel’in asepaite lamkai din Amasa kitipa chu ana pan sah tan ahi. Chule Amasa kitipa hi Ishmael mi pasal khat amin Jether kitipa chapa ahin, Jether hin Joab nu, Zeru’iah sopinu Nahash kitinu chanu Abigail chu aki chenpin ahi. <sup>26</sup> Chuin Israel chate leh Absalom hin Gilead gamsung a ngahmun asem tauvin ahi. <sup>27</sup> David chu Mahanaim ahung lhun phat’in, Ammon mite

kho Rabbah a konin Nahash chapa Shobi le Lodebar khoa kona Ammiel chapa Makir toh, chule Rogelim khoa kona Gilead mi Barzillai chutoh ahung un ahi. <sup>28</sup> Chuin lupna jalkhun phabep le kisil na kong ho, leibel phabep toh, suhlou chang le sakol chang, neh ding an, chule changpol kansa, louthul le bekan ahin pouvin ahi. <sup>29</sup> Chujongle khoiju le bongnoiha ahin, kelngoi jong, bongnoi thao jong David le alhonpi miho neh ding chun ahinpou've; ijeh-inem itileh amaho hin aseu uvin, "David le aloi te mipi hi gamthip laiya gilkel'uva tha lhasam tah a'umah ahi tauve," atiuvin ahi.

## 18

### *Absalom Kijo Le Thi*

<sup>1</sup> Hichun lengpa David chun apan pi sepai techu asim doh soh keyin, achunguva mi asang sang chungga lamkai ding, aja ja chungga lamkai ding agoltoh soh kei tan ahi. <sup>2</sup> David chun sepai hop thum'a hop khat chu Joab alamkai sah in, hop thum'a hop khatma chu Joab sopi pa Zeruah chapa Abishai chu alamkai sah kit in, chuteng le hop thum'a hop khat kit ma chu Gath mi Ittai chu alamkai sah in; hichun miho koma chun hitin aseuye, "Keima tah jong nangho toh gal ikon khom diu ahi," ati. <sup>3</sup> Ahivangin mipin aseiyin, "Nangma gal na kon doh louhel ding ahibouve. Ijeh-inem itileh keiho hi hung galjam u jong leng, amahon iman igel khoh pouvin te, keiho akeh khat hel thi jeng tau jong leng amahon ima agel deh lou diu ahi. Nangma vang keiho mi sang



som to kibang nahi; chujongle nangman khopi sunga kona kei ho panpi mi nahin sol thojoh ding hi thilphajo ahi,” atiuve. <sup>4</sup> Hichun lengpan jong hitin aseieye, “Ipi hita jongle nang ho dinga aphapen tah hi ding chu keiman kabol jeng ding ahi,” atitai. Hijeh chun lengpa chu kelkot phunga ading den in, sepai te vang chu aja jan asang sang in akitol doh tau’ve. <sup>5</sup> Chuin lengpan Joab, Abishai chule Ittai chu ahil dem demin, “Keima ja nan gollhangpa Absalom chu lung neng tah in hin bol’uvin,” ati. Absalom chung changa lengpan sepai lamkai mithum athu lhah na chu mipin abonchan aja soh keiuve. <sup>6</sup> Hiti hin sepai techu gamlah a Israel chate toh kisasat din akon doh tao’ve; hichea chun Ephraim mite gamsung gammang lah a gal akisat tauvin ahi. <sup>7</sup> David sepai ten Israel mite chu ajou taove, hiche nikho a mi atha u chu am lseh jeng in, mihem sang som ni alhinge. <sup>8</sup> Gamsung pumpia gal a kithe chansoh kei tan, chule chemjam a kisasat lih sang in gammang lah a ohlih mihem amamjon ahi. <sup>9</sup> Absalom jong chun David sepaite atoh kha khel khel’in ahi. Absalom chu asakol pol chungahung tou ahin, hichun sakol pol chu gangpi thing lentah khat abah kai nel nul lah khat a chun a lhailut’in abah lah ahopan ahileh, Absalom chu aluchang gangpi bah lah a a-oh den tai chule sakol pol chun adalhan anoiya ache pai tan ahi. <sup>10</sup> David sepai khat chun Absalom chu amudoh phat’in Joab koma aseipeh in; “Ven, keiman Absalom chu gangpi phung bah lah a akikhai den kamui,” ati. <sup>11</sup> Joab jong chun akoma thuseipa chu adong pai in,

“ipi Absalom kamui natim? Ibola hikoma chu tol'a na satlup da ham? Chutin hinbol le chun keiman dangka shekel som khat beh le kong gah khat nape dinga chu,” ati. <sup>12</sup> Ahivang in mipa chun Joab koma aseï kit e, “Keiman dangka shekel sang khat kamu ding hijong leh lengpa chapa tha na ding in kakhut lam hih hel inge; ijeh-inem itileh keiho jah tah in jong lengpan nangma le Abi'shai chule Ittai thu nape cheh-uvun, ‘Keima ja nan gollhangpa Absalom chu ahing in hin hoi teitei un,’ tin aseïbouve. <sup>13</sup> Lang khatma keiman kathi le kathi, tin jou le nal'in hin bol jeng jong leng, lengpa mudin imacha akisel theiya aum deh poi, chutengle nangman nang ding bou nagel a neidon lou hel ding ahi,” ati. <sup>14</sup> Hichun Joab in aseï paiyin, “Keiman hitobang hin nangma toh phat sumang mang ponge,” atin, gangpi phung bah lah a Absalom ahinga aum nah laiya ahileh tin Joab chun tengcha achom thum alan agah pei a ahileh Absalom lungchang don tah a akiphut tai. <sup>15</sup> Chuin Joab galvon poa pang gollhang sepai som khat'in Absalom aumkim'uvun ajep'un atah tauve. <sup>16</sup> Chuin Joab chun saki pengkul amut'in ahi leh sepai ho chu Israel te nung adel nauva konin ahung kinungle soh keitauve. <sup>17</sup> Chuin amahon Absalom long chu adom lhauvin gammang lah a kokhuh lentah khat sunga aleh lut'uvun, achunga song tum tampi asep khum'uvun ahi; Israel chate vang chu ama ama inlam cheh a akijam lut sohtauvin ahi. <sup>18</sup> Chule Absalom hin ahinlaiyin lengpa phaicham a chun khom khat ana phut doh in ahi; ijeh-inem itileh aman ana seiye, “ Keiman

kamin aman louna ding in chapa la kaneipon,” atin, akhom phudoh chu ama min aputsah in, hijeh chun hiche hi tuni gei in Absalom kihet jingna tin akiseiye.

### *Absalom Thi David In Pul Adou*

<sup>19</sup> Chujouvin Zadok chapa Ahimaaz kitipa hin “Keima lhai jing ting, Pakaiyin amelmate khut’a kon in am,a ahuh doh tai, tin lengpa David koma ga seipeh tang e,” ati. <sup>20</sup> Ahinla Joab chun ajah a aseiyee, “Tuni nangma thupole a napan thei lou ding ahi; nidang dang leh thupon pang nan nate, tunia vang thupo a napan thei louhel ding ahi; ijeh-inem itileh lengpa chapa athi tai,” ati. <sup>21</sup> Chuin Joab chun mipa koma, “Nangma chen lang nathil mubang bang chun, lengpa ga seipeh tan,” ati. Chuin mipa jong chu salam bolnan akun in, chujouvin alhai jel tai. <sup>22</sup> Chujouvin jong Ahimaaz kitipa le Zadok chapa chun Joab koma hitin asei kit na lai e, “Asoh soh sohjeng hen, kei jong mipa nung a khun lhai tang e,” ati kit leuvin ahi. Hichun Joab chun aphoh in, “Nathupoh jeh a kipaman bon mulou dinga, ipi pen deichat na a nangma nalhai jeng ding ham chapa?” ati. <sup>23</sup> Ahivang in aman, “Asoh soh soh jeng hen, kei jong lhai jeng ing e,” atia asei kit phat’in, Joab jong chun ajah a aseipeh in, “Lhaijo lhai in,” ati tai. Chutah chun Ahimaaz chu phaicham lang Mahanaim lampi a chun alhai in ahi leh Ethopia mipa chu akhel tai. <sup>24</sup> David chu kelkot te ni kikah a toujing jeng ahin, kelkot ngah pachu kelkot chung, inchung a chun akaldoh in palvum a chun a um’in

ahileh mikhat achanga amaho langa hunglhai khat amutan ahi. <sup>25</sup> Chuphat'in kelkot ngah pan leng pa ahin kouvin aseï peh tai. Lengpan jong ale seipeh kit'in, aching ahileh thusoh ahinpoh ding ahi atin "Ahung lhailut pai pai in, ahin nailut tai. <sup>26</sup> Chuin kelkot ngah pan michom khat ma amukit in, ama jong chu ahung lhai lhai jeng e; chuphat'in kelkot ngah pan kelkot phung lama chun ahin kouvin, "Ven, ven, mi khat jong achang seh in ahung lhai kit e," ati. Lengpan jong aseï kit'in, "Ama jong khun thupha ahin poh hiya khu," ati. <sup>27</sup> Kelkot ngah pa chun, "Ahung lhai masajo pa khu Zadok chapa Ahimaaz lhaitoh kakilom sah lehe jenge," atileh; leng pan jong, "Ama chu mipha ahin thupha ahin poh hiteiyin te," ati. <sup>28</sup> Chutah chun Ahimaaz hin lengpa ahin kouvin, "Ijakai aphasoh keiye," ati. Chujongle ama chu lengpa angung a abohkhup'in tol'a amai asulut'in aseïye, "Pakai na-Pathen, kapu lengpa douna akhut lam jouse eipedoh soh kei uvah ama chu nun nom hen," ati. <sup>29</sup> Hichun lengpan jong adong pai in, "Gollhangpa Absalom ima tilou hinam?" atileh, Ahimaaz chun adonbut'in, "Nasohpa hi Joab in eihin sol pet chun mihon pi kinong lul lul kamun, ipi iti ham ti kahepoi," ati tai. <sup>30</sup> Chuphat'in lengpan jong, "kikhin doh inlang hikoma khun ga ding tan," atileh; ama jong akikhin doh pai jeng in, ading thip beh jeng tai. <sup>31</sup> Vetan, hichun Ethopia mipa chu ahung lhung pai tan ahi; hichun Ethopia mipan hitin aseï e, "Kapu lengpa ding in thupha tah kahinpoi! Ijeh-inem itileh Pakaiyin tunia nangma dou dia kipan mite khut'a konin nahuh

doh tan ahi,” ati. <sup>32</sup> Chuin lengpan jong Ethiopia mipa chu adong paiyin, “Golhangpa melmate jouse leh nangma douna a thilse bol dinga kipan jouse hiche golhangpa chutoh bang soh kei u hen,’ ati tai. <sup>33</sup> Chuphat’in lengpa chu adip dam behseh jengin, hichun indan chung nunga chun akaldoh in, akap tai; ache pum pumin, “O kachapa Absalom, kachapa; kachapa Absalom! Nang khel a kei kathileh iti ham, vo Absalom, kachapa, kachapa!” atin ahi.

## 19

### *Joab In Lengpa Apho*

<sup>1</sup> Joab koma chun, “Lengpa David chun Absalom pul adou lel in akap kap jeng tai,” tithu agalhung tan ahi. <sup>2</sup> Hijeh chun hiche nikhoa gal kijo chu mipi abonchauva din pul douna a sohdoh jo tan ahi; ijeh-inem itileh hiche nikho hin mipin abonchan ajauvin, “Lengpan achapa thi pul adou lel lheh jenge,” akititai. <sup>3</sup> Sepaite jong chu hiche nikho hin guhthim chan khopi sunga ahung kijot lut’uvin, gal alel niuva jachat thoh'a hung vah lut bangin ahung lut tauve. <sup>4</sup> Hichun lengpan amai akhut in akikhun, othongje jun lengpa akap jah jengin, “Vo Absalom, kachapa!” atin asam sam jeng’e. <sup>5</sup> Hichun Joab jong lengpa insunga ahung lut’in hitin aseitei, “Tuni hin nangman na sepaite jouse hinkho ahin, nangma hinkho ahin, nachate numei le pasal jouse hinkho jong chule najite leh nathaikem ho hinkho huhhing'a pang jouse mai najum sah tai ati. <sup>6</sup> Ipijeh-inem itileh nangman nahot bolte nalungset jon, nalungset

te joh nahot boljo tai. Ajeh chu tunin nangman kichen tah in naseidoh tan, gal lamkaiho leh sepaite hi nang dinga imacha louva pang danin nabol tan ahi. Ijeh-inem itileh tuni hin Absalom chu kihing hoi hen lang keiho hi kabonchauvin thigam jengu leng nangma nalung lhaijo ding ahi. <sup>7</sup> Hijeh chun tun kipatdoh in lang pot doh pai pai jengin lang nasohte koma thu ngeitah tah in hung sei loiyin; ijeh-inem itileh Pakai mina kihahsel kahi, nangma nahung potdoh louva ahileh tujan jenga jong hi mihem khat'a khat chan jong nagepi louhel ding ahitai; chuti hen lang hileh, nachapa gollhangpa a kona nachunga hung lhung thilse hijat sanga jong hiche thilsoh ding hi khohjo ding ahi," ati. <sup>8</sup> Chuphat'in lengpa jong akipat doh jengin kelkot phunga atouna a chun atoutai. Hichun mipi abonchauva jah dingin aseipeh tai, "Vetan, lengpa khu kelkot phungbula atou tai," atiuva ahileh; chuphat'in mipi ho chu abomnchauvin lengpa angunga ahung kitol lutsoh tauve, Israel chate Absalom nungjui ho vang chu ama ama inlam cheh a ajam lut soh tauve. <sup>9</sup> Israel phung chujat lah a chun mipi abonchan aboilah lah jenguvin, hitin aseiyuve, "Lengpa David chun imelmateu khut'a kona jong inahuhgingu uva chule Philistines te khut akon a jong eina sochat sah u ahin, hinlah Absalom agin jeh a gamsunga kona jamdoh ahitai atiuve. <sup>10</sup> Chule tua ichunguva leng chang dinga thao inupau Absalom la galmu nin athitan. Chuti ahileh ibola David chu ileng diuva elekoukit dadiu ham? akitiuve. <sup>11</sup> Hichun David lengpan jong thempu te ni Zadok le Abiathar koma thu

athot'in hitin aseiyé, "Judah mi upate koma seipeh lhon in lang, 'Lengpa koma Israel dang jouse thu hung lhungsoh ta, ipi dinga nang ho hi lengpa in'a puilut kit ding thuseiya anukhahpen a pang naiuven? <sup>12</sup> Nangho hi keima inkote mong mong, kaphe le kathisan nahiue; ahileh ipi dinga nang ho lengpa puiding thusei nukhah a napan diu ham?' ati tilhon'in. <sup>13</sup> Chujong leh Amasa kitipa koma jong nasei peh lhon ding, 'Nang hi keima thisan le phe mong nahi lou ham? Tua lhah nang hi Joab panmun khela sepaite lamkaiya napan lou poupouva ahileh Pathenin abolnom nomin eibol hen, akhoh cheh jon jong eibol hen, kapan sah ding nahi,' tin a seiye, nati lhon ding ahi," ati. <sup>14</sup> Hichun Amasa chun Judah mite chu mihem khat sheh abahsah jengin alungu kitoh del'in, athu nun'in, hijeh chun amahon thu ahin thot paiyun, lengpa henga chun, "Nang le nasepaite nabonchauvin hung kile kit jeng uvin," atiuvin ahi.

### *Jerusalem'a David Akile Kit*

<sup>15</sup> Hijeh chun lengpa jong Jerusalem ahung kile kit tan ahi. chule Jordan vadung ahung lhung tan ahile Judah jong chu lengpa lamtoa Jordan vadunga apui galkai din ahungun Gilgal ahung lhung taove. <sup>16</sup> Gera chapa Shimei kitipa Benjamin phunga mipajong chu Bahurim khoa pat'in David lengpa lamto din kino tah in Judah mite chutoh ahung kilhon suh tai. ☆ <sup>17</sup> Chule midang Benjamin phunga kon misangkhat, Saul insunga dia sepai jalamkai Ziba jaonan, chule

---

☆ **19:16** 2 Samuel 16:5-13

Ziba chapate somlenga le asoh somni toh ahung thaovin Jordan vadung a lengpa kimupi din ahung lhailhao vin ahi. <sup>18</sup> Hitichun lengpa leh a ingsungmite chutoh Jordan vadung ahung galkai un, kithopi nathei chan in ejakai in amachu akitho piu vin ahi.

Shimei dinga David khutona lengpan Jordan vadung ahin galkai ding toh lhonin, Shimei chu ama angungah abokhup in ahi.

<sup>19</sup> Shimei chu ataovin, “kapakai lengpa, lungset tah in neingaidam in,” nangman Jerusalem nadalhah a nalhachan thil phalou tah tah kabol hochu heimil inlang nalungungah jong umсах datan ati. <sup>20</sup> keiman kahei echan a chonse kahi hitam. Hijeh achu tunia hilai mun hung kahi, Israel te jouse lah a dinga kapakai lengpa lamto masapen a. <sup>21</sup> Chuin Zeruah chapa Abishai in ase in, Shimei hi thading ahi, ajeh chu aman leng thao kinupa hi agaosap ahi. <sup>22</sup> Hichun David in ahinsei in, Zeruah chapa kon nang nadoh beh ham ati. Epi dinga tonia nangma keima melma a pang gu nahim? Tonihi achaini ahipoi, ajeh chu tonia hi keima Avella Israel te leng kahikit ahitai ati. <sup>23</sup> Hichun Shimei lamma akihei in, David akiahahsellin, nahinkho hi kahing hoi ding ahi ati.

### *David In Mephibosheth Akhuto*

<sup>24</sup> Chuin Saul tupa Mephibosheth chu Jerusalem ahunsuh in lengpa ahung kimupin ahi. lengpan Jerusalem adalhah nikho apet chun akeng, akhamul chule avon sop ding emacha



akhoh sah tapon ahi. ✧ <sup>25</sup> Chuin lengpan adonbut in, Mephibosheth epi dinga keima toh nahung khom lou ham? ati. <sup>26</sup> Hichun Mephibosheth in adonbut in, kapakai kalengpa kasohpa Ziba in eijou lhep in ahi. keiman kaseipih in, ka sangan chu gongtoh in khuti leh lengpa toh kachi khom thei ding ahi kati ajeh chu nangman neihet banga keima hi elbai kahi. <sup>27</sup> keima kahungnom lou dan in Ziba in ase in eijoulhep e. ahin keiman kahe nai kapakai kalengpa hi Pathen vantil tabang nahin, hijeh chun nangman nagel a aphai nati ti chun bol tan ati. <sup>28</sup> Chule keima le kainsung mite jouse hi athi dinga lom kahi bou ve ka pakai, hinlah hichu hilou vin nangman neijabol in nadokhangah an neineh khompi e! hiche kalvar a chu epi kathum nahlai ding ham? <sup>29</sup> Nangman aphatai nati, chu in David in adonbut in, nangma le Ziba hi nagam sung chu kitoh chat a nakihop lhon ding in kagel lhatai. <sup>30</sup> Chu in Mephibosheth in aseiyin, amachan ding jouse chu petan ati. Nangma damsella nahung kile kit hi keidin apha set tai kapakai le kalengpa ati.

### *David In Barzillai Akhuto*

<sup>31</sup> Gilead mi Barzillai chu Rogelim akon ahung-suh in Jordan vadungah lengpa chu ahung kimupin ahi. ✧ <sup>32</sup> Amahi akum ahan tan midam thei tah kum somget ahi tan ahi. chule amahi ahi lengpa Mahanaim aumlai a nehding pipa chu. <sup>33</sup> Chu in lengpan Barzillai kommah ase in hung inlang keitoh Jerusalem ah hung cheng tan

. keiman hilaimun ah chu nangma kavetsui ding nahi ati. <sup>34</sup> Hichun Barzillai in ahin donbut in, ahipoi keima Jerusalem chan hung ding in kateh var tai ati. <sup>35</sup> Tun keima kum somget kahitan, chule keiman emacha kanupsah pithei aum-tapoi. Ju le an jeng jong atui tapon, chule lasa them ho lasah jong kangai nom tapoi. Keimahi kapakai lengpa dia alungkham nabep kahi ding ahitai. <sup>36</sup> lengpa toh Jordan lui galkai ding bou chu kangaichat thupi pen ahijoi. <sup>37</sup> Chuteng le keima athidia kanu le kapa kivuina gamsunga kakinung le ding ahi. ahin hichehi nasohpa Kimham kachapa ahi. amahi kapakai kalengpa toh kilhon henlang chule nangman napeh nom chan chu aman kisan hen, ati. <sup>38</sup> Chuin lengpa jong anom tan aphai, Kimham toh kachikhom ding chule aman adei nalam chan a kakithopi ding chule adei angai chan kabolpih ding ahi ati. <sup>39</sup> Hiti chun mipi jouse chun lengpa toh Jordan chu agalkai tao vin ahi. chuin David in Barzillai chu phatthei aboh a achop jou vin, Barzillai chu a inlam akile kit tan ahi. <sup>40</sup> Chuin lengpan Kimham alhonpin Gilgal akhokel tan ahi. Judah sepai jouse le Israel seapi kehkhath in lampi ah analam touvin ahi.

### *Lengpa Chung Kinelna*

<sup>41</sup> Ahin Israel mite jouse chu lengpa chungah akiphin taovin, Judah miten lengpa chu natom chahkheh un keihon nang nahin namite ahin Jordan nahung galkai nadiu vin kithopi nading phat eipipouve atiu vin ahi. <sup>42</sup> Chuin Judah miten adonbut un, lengpa hi keiho son chilhah

mong ahi. epi dinga hichehin nasuh lunghang uham? Keihon lengpa akon neh ding ahilou leh thilphachom ema kakisan pouve atiu vin ahi. <sup>43</sup> Ahin adanghon ahin donbut un Israel sungah phung soma um nalai e atiuve. Hijeh chun keihon lengpa chungah somvei jen nangho bol bangin thaneina kanei uve ati. Hitabang abol nadinga hi epi tha nanei uham? Keihohi kahi lou uham amasapen a amahi leng hisah kit ute tichu? Kinel nachu anung ama ah achijom jing in chule Juda mite chu Israel mite sangin aham ngaimo lhez un ahi.

## 20

### *Sheba Galbol*

<sup>1</sup> Hiche phat laihein pan nabei mikhat ana um'in amapa chu amin Sheba akiti, ama hi apa min Bicri ahin, Benjamin phunga mi ahiye; Chule Sheba kitipa hin saki pengkul amut gingin lhang asamin aseitai, "David koma eihon chan ding inei pouvin, Jesse chapa koma goulo ding inei pouve' Vo Israel mite, nangma nangma ponbuh kijot cheh tauvin," ati. ✧ <sup>2</sup> Hichejeh chun Israel miten abonchavin David adalha soh hel tauvin, Bicri chapa Sheba nung ajui cheh tauve; ahivangin Judah miten alengpao chu lunglut tah in Jordan vadunga pat Jerusalem geiyin ajui lut peh tauvin ahi. <sup>3</sup> David chu Jerusalem ahung in ain ahung lhungtai, chuin lengpan in ngah dinga adalhad thaikem numei som ho chu abonchan aman khom soh keiyin in khat a akoikhom in, chule

---

✧ **20:1** 1 Lgt 12:16; 2 Thusimbu 10:16

hiche in chu mi angah ding sepai akoiyin, neh le chah vang apenan, amaho hi avil tapon, aluppi tapoi. Hijeh chun amaho hi athi ni geiyuvin cha hing louvin aumsohkeiyun, meithai bangin aumsoh keitauve. ☆ <sup>4</sup> Hichun lengpan Amasa koma aseipeh in, “Nithum sungin Judah phunga mite abonchan kou khom soh keiyin lang, nangmatah jeng jong hikoma hin hung kikhomuvin,” ati. <sup>5</sup> Hijeh chun Amasa jong Judah mite kou dingin akondoh tai; Ahinla ama dinga aphant kitep peh sangnga tamjo ahin la tan ahi. <sup>6</sup> Chuphat’in David chun Abishai koma chun aseiyin, “Tua hi Sheba kitipa Bicri chapa khun Absalom eibol nau sanga khohjoa eibol diu ahi; nangman napu lhacha sepaite khu kipuiyin lang anung delpeh in lang, gamantan achuti louva ahileh ama in kulpi kikaikhum khopi phabep akisah doh a eiho eisuh genthei diu ahi,” ati. <sup>7</sup> Abishai nung juiyin Joab jong Chereth mite jong, Peleth miho jong, chule mihat jouse jong abonchan akitol soh keiyuvin ahi. Chule amaho hi Jerusalem khopia konin Bicri chapa Sheba nung del dingin akondoh tauve. <sup>8</sup> Amaho hi Gibeon khopia songpi lentah phung ahung geiyuvin Amasa jong amaho lamto dingin ahung tai. Hichun Joab hi sepai vonin akivonin, chule akongjanga chun konggah khat hin chemjam apaiyin akipoh in ahi; amasang lam’uva Amasa chibei bol din achepheiyin, hichun ahung kibalhun achemjam chu ahungkithol doh paitan ahi. <sup>9</sup> Hichun Joab hin Amasa koma hitin aseiyen, “Sopi nadam dam hinam? tin adongin, hiti chun Joab hin

---

☆ **20:3** 2 Samuel 16:22

Amasa chu akhut jetlam in amanin abengmul chun atuh chah jenge abeng achop ding bangin. <sup>10</sup> Hichea hi Amasa hin Joab in akhut veilam a chemjam akidop lam chu anahet lou ahiye; hiti hin Joab chun Amasa chua oipoh asutpih in; hichun avela sat kit louhel'in khatvei she she chun ama jong athidel jengin ahi. Chujouvin Joab le asopipa Abishai chun Bicri chapa Sheba nung chu adel pai pai tauve. <sup>11</sup> Chule Joab sepaite lah a mi khat chu Amasa long phunga aga dingin hitin aseiyee, "Koi koi hijongle Joab panpia David dinga pang jouse chun Joab nung jui cheh hen," ati. <sup>12</sup> Hichun Amasa vang chu lamlen kim laitah a athisan lah a akisai saiyin alumden tai. Lampia hung mi jouse chun amudoh tengule ading cheh jiuvin, hijeh chun alongkom a dingpa chun miho jouse agahdin ji jeh u chun Amasa long chu akaimangin gamlah a apolut in pon akhu khumtan ahi. <sup>13</sup> Chuin Amasa chu lamlen lailunga kona akai mang phat chun mipi sepai jouse jong chu Joab nung juiya Bicri chapa Sheba nung del dingin ache pai pai jeng tauve. <sup>14</sup> Sheba hin Israel mite phung tin anakhol soh keyyin, Bethema'acah gam'a Abel chan gei anajot man in ahi; hijeh chun Bicri mite jouse akikhom'ugin ama nung ajui soh hel tauve. <sup>15</sup> Hichun Joab to pang khom mite chu abonchan ahunguvin Bethma'acah gam'a Abel khoa chun Sheba aga'um tauve. Khopi um nan pal akaiyuvin, chule khopi pal chutoh kingat ton leipal chu akikhang doh jenge; Chuin amahon khopi pal chu phetjal dingin agouvin avojal pan-tauve. <sup>16</sup> Hichun khopi sung langa konin numei

miching tah khat hinmi ahinkouvin, “Ngaiyuvin, ngaiyuvin, keiman Joab chu kaki houpithei na dingin hinsei peh’uvin lang hilai muna hin hung hen, ati hintiuvin,” ahinti. <sup>17</sup> Hiphat chun Joab jong chu amanu koma chun ahungin ahileh, numeinu chun hitin aseipeh tai, “Nangma Jo’b nahim? atia ahileh aman jong adonbutin, “Ka hinai,” ati. Hichun numeinu jong chun Joab koma chun aseikit’in, “Nasohnu keima thusei ding hohi ngai temin,” atia ahileh; Joab in jong adonbut’in, “Kangai peh nai,” ati. <sup>18</sup> Hichun numei nun jong aseitai, Masanga gol lui laiyn tehse hon hitin ana sei uve, Abel khoa mi bou kidong ding ahi,’ tin aseiyiue; hiti hin ipi thu hijong leh ana seichai jiuve. <sup>19</sup> Hitia chu keima jong hi Israel mite lah a cham na bol ji le kitah taha hinkho mangmi khat chu kahi; hijeh chun tun nangman Israel chate din penna khopikhat hi thagamdingin nahol’e; ibola nangman Pakai goulo athilkeo hi hitia hi suh mang jeng ding nati ham?” ati. <sup>20</sup> Hichun Joab jong chun adonbut’in, “Keiman itih hijong leh khopi kasuh mang louhel ding ahi ai! <sup>21</sup> Nasei chu adih poi, ahin Ephraim gam'a thinglhang mi Bicri kitipa chapa khat amin Sheba kitipa chun David lengpa dou nan akhut alamtai; ama chu hinpe doh jenguvn, chutileh keima khopia kona hi kaki nungle jeng ding ahi,” ati. Chuphat’in numeinu jong chun adonbut paiyin, Joab koma chun aseitai, “Vetan, naseipa chu palvuma aluchang tansa hung kileh lha ding nakoma hung chu ding ahi,” atipehe. <sup>22</sup> Numeinu chu alungthima achihna bang dungjuiyin khopi sunga anung chen mipi jouse

koma chun hitin aga seitai. Chuin mihon Bicri chapa Sheba chu alu atanuvin, Joab koma chun agasep lut tauve. Chuphat in Joab chun saki pengkul chu amut paiyin, khopia kon chun akikhen cheh soh keyyun, mi jouse chu ama ama in cheh a ache tauve. Joab vang chu Jerusalema lengpa koma dingin ahung kile kit tai. <sup>23</sup> Hichun Joab kitipa hi Israel chate pumpi dinga gal lamkai lenpen chule sepai jouse chung a vaipo ahin, Jehoiada chapa Benaiah chu Chereth mite leh Peleth mite sepai ho lamkai vaipon apangin; <sup>24</sup> Chule Adoniram kitipa chu engbol a um soh natonga pangho chung a chun vaihom in apangin, Ahilud chapa Jehoshaphat kitipa chu thuching lekha koiyin apangin, <sup>25</sup> Sheva chu lekha sun in apangin, Zedok le Abiathar chu thempun apang lhonin, <sup>26</sup> Chule Jair mi Ira vang chu David din thempun anapang tan ahi.

## 21

### *David In Gibeonites Mite Alethuh*

<sup>1</sup> Hitichun leng David khanglai hin kum thum sungin kel analhan, hijeh chun David jong chun iti ding ham, tin Pakai chu adong tan ahi, chuin Pakaiyin hitin ahinseiye, “Saul chun Gibeon mite anatha jeh a Saul le a insung mite chung a thisan so jal a themmona aum jeh ahi,” ati. <sup>2</sup> Hijeh chun lengpan jong Gibeon mite chu akoukhom soh tai. chule Gibeon mite hi Israel chate sung peng mi ahipouvin Amor mite chia peng athimoh ho ahibouvui; chule amaho hi Israel chaten thalou dinga anasei vanguvin, Saul chun ami Israel chate leh Judah tedinga atom ngai

na jeh-a amaho hi suhgam ding anati ahi. ☆  
<sup>3</sup> David'in hiche Gibeon mite koma chun hitin aseiyé, "Ipi kabol peh diu ham? Itobang mongin longman nasem peh theiyu leng nanghon hiche Pakai goulo mite hi phatthei naboh thei dingu ham?" tin adong tai. <sup>4</sup> Hichun Gibeon miten leng David koma chun aseiyun, "Keiho le Saul chule ainsung mite kah a thuhi dangka le sana peh a kihoucham na thei ding jong ahipoi, keihon Israel mite lah a mihem khat tou ka thalo diu thujong ahi deh poi," atiuve. Chuin David chun aseí kit'in, Ahile ken nang ho dinga ipipen ba ka bolpeh diu ham? Neiseipih un khuti leh ken nang ho dia kabolpih ding nahiu ve" ati. <sup>5</sup> Hiti chun amahon jong lengpa koma chun, "Israel gamsunga chen-mun ge-mun kanei lou helna diuva keiho suhgam nadia lunggel tohgon ananei chu Saul ahi atiuve. <sup>6</sup> Hijeh chun Saul chate pasal sagi ho chu keiho khut a neihin peu vin lang, chule keihon jong amaho chu Gibeon khoa Pakai molsang chungga khun Pakai angسunga ga khailih jeng'u vinge," ati tauve. Chuphat in David jong chun, "chuti ahileh amaho mi sagi chu nape nau vinge," atipeh tai. <sup>7</sup> Lengpan Saul chapa Jonathan chapa Mephibosheth vang chu ahing hoiye; ijeh-inem itileh amanin Pakaiya kihahsel na ana nei lhon ahi, David le Saul chapa Jonathan in kihahsel na ananeisa lhon ahitai. ☆  
<sup>8</sup> Chuin lengpan Aiah chanu Saul jinu Rizpah chapate ni Armoni le Mephibosheth amanin, Saul chanu Merab chapate mi nga jong amanin,

---

☆ **21:2** Joshua 9:3-15 ☆ **21:7** 1 Samuel 20:15-17; 2 Samuel 9:1-7



amaho hi Merab hin Meholath mipa Barzillai chapa Adriel kitipa chutoh ahinlhon ahi; ✧  
 9 David'in mi sagi hi Gibeon mite khut a apedoh tai; chuin amahon jong hiche pasal sagi ho chu molsang chung a Pakai angsunga akhaiyuvn, mi sagi jenchu athigam tauve. Amaho atha niu chu sakol chang-at kipat til ni chu anahi. 10 Chuin Rizpah kitinu amin Aiah chanu hin khaodip pon akilah in, songpi chung khat'a akisil khaodip pon chu aphan, chang at kipat til a pat chun vana kona chuh go ahung juh kahsen apha pha jenge; sun teng jongle chung a leng vachate aponpha chung a chun atousahpon, chubang ma chun jan teng jongle gamsa ho chu ponpha chung a chun alutsah deh pon ahi. 11 Chuin Saul thaikemnu Aiah chanu Rizpah thilbol umchan chu David koma aseipeh phat'un, 12 David jong achen Saul leh achapa Jonathan gu-lheng lhon chengse beh chu Jabesh-gilead kho haosate koma agalan ahi. Chule hiche haosa hohin, hiche gu-lheng lhon ho hi Philistine miten Gilboa molsang chung a Saul ajo chung uva, Philistine mihon Saul leh achapa Jonathan Beth-shan kholai dunga akhai nauva aga guh doh-u anahi. ✧ 13 David chun hiche muna kon chun Saul leh achapa Jonathan gu-lheng lhonho chu agapon, chuin mihon amani banga kikhailih jouse gubuh chengse chutoh akoikhom tauvin ahi. 14 Chuin lengpan gu-lheng lhon ho chu Benjamin gamsunga Zela khoa Saul pa Kish lhan khuh a avuidiu vn thupeh aneitan ahi. Chule miho hin lengpa thupeh bang bangin

---

✧ 21:8 1 Samuel 18:19 ✧ 21:12 1 Samuel 31:8-13

abolsoh keiyuvin ahi. Hiche nunghin Pathenin gamsunga kel lhah chu akichai sah tan ahi.

*Israel Te Leh Philistine Mihatho Kidouna*

<sup>15</sup> Hichun Philistine mite chun Israel chate dounan gal ahinbol uvin ahileh, David lengpa jong chu asepaite toh kilhonin gal akonsuh kit'in Philistine mite dounan gal agasat tauve. Hichun David jong chu atha achol lhez jengin ahi. <sup>16</sup> Chuti chun gal muna chun Rapha gal hatpa chilhah a mi khat amin Ishbi-benob kiti pa hi apangin, ama chu atengcha jeng jong agih dan sum-eng jeng shekel ja khat alhingin, chule amahin chemjam thah lih khat akonga akikon, David chu tha jeng dingin ahin gotan ahi. <sup>17</sup> Ahin Zeruah chapa Abishai chun David ahung panpin, Philistinete gal-hatpa chu adel khumin athat tan ahi. Chuphat'in David chu asepaite ajadauvin, "Nangma tukal keiho toh gal ikon khom louhel diu ahitai, achuti loule namoh thilo ding ahin, Israel chate lah a meivah banga navah hi mit jeng thei ahi,"atiuve. ✧ <sup>18</sup> Hiche jou nunghin Gob muna Philistinete toh gal kikat na aum kittai; hichea hin Hushah mi Sibbecai kitipa chun Philistine gal hat miho chilhahte lah a mi khat Saph kitipa chu athat kit'e. <sup>19</sup> Gob mun ma ma'a chun Philistinete ma ma chutoh gal kikat na ana um kit un ahi. hichea jong hin Bethlehem khoa mi Elhanan kiti Jair chapa chun Gath mi Goliath athat kit'in ahi, Goliath tenglung chu thingtum tejen aphan ahi. <sup>20</sup> Chujouvin Gath khoa gal ahung soh kit tai; chule galmuna chun

---

✧ **21:17** 1 Lgt 11:36; Labu 132:17

mi adung sangtah khat ana um'in, amapa chu akhut phang lang khatcheh a chun akhutjung gup gup akeh in ahi; chule akengphang lang khat gel a jong chun akengjung gup gup cheh akeh in ahi; abonchan akhut jungle akengjung agoma som ni le li alhinge; chule ama jong hi galhat mihangte chilhah khatma anahin ahi. <sup>21</sup> Ahin aman Israel mite athu angailouva, aseiset phat chun David sopipa shimea chapa Jonathan in atthat tan ahi. <sup>22</sup> Philistines mi hicheng li hi Gath khoa gal hang mihatte son leh chilhah ahivu; ahin abonchauvin David le asepaite khut a ana thisoh kei tauvin ahi.

## 22

### *David Thangvah La*

<sup>1</sup> Hitichun Pakaiyin amelmate jousea kon leh Saul khut'a kona ana huhhing jal in David in hichela hi Pakai henga anasan ahi. <sup>2</sup> Hitin lacheng aseme, "Pakai chu keima dingin Kasongpi leh kakulpi chule eihuhhingpa ahi, <sup>3</sup> Ka-Pathen leh kasongpi Kakiselna nahi; Kapho le eihuhhingka kasakhia pang, Kakulpi pal le kakisel na nahin, Eihuhhingpa nahin, pumhat'a kinona lah a jong nei huhdoh ji'e. <sup>4</sup> Vahchoi dinga lomtah Pakai henga kataoyin, chule Kamelmate a konin huhhingna kachang tai. <sup>5</sup> "Ajuh chu thina luipin eilon khuntan, Manthah na lam jousen eilon khum tai; <sup>6</sup> Noimigam khaoguiyin eihen tan, kamasanga thina ding thang akikam'e. <sup>7</sup> Ahin "Kagenthei pet'in Pakai henga ka taovin. Ka-Pathen koma chun kataovin ahi. Pathen houin a aman kataona asang jin, hichea chun

anabenga kataona alut ji'e. <sup>8</sup> Hichun leiset akinuh nuh jin ling akihot tan ahi; Van todap khompi jouse jong akiling soh hel jenge; Pathen alung han jeh chun lingpi ahin hot jengin ahi. <sup>9</sup> Chule Anah hom sung tenia konin meikhu ahung kitung doh in, chule akamsung a konin mi bahgam thei mei akonge; Meial deuje ju Pathena konin ahung kitung doh jenge. <sup>10</sup> Aman van mun jouse asonkun jengin ahung kumlhai, Akengto noiya muthim lhangkhal akiheh jenge. <sup>11</sup> Pathen Cherub chung a touvin alenge, huipia akijap'a alen akimui. <sup>12</sup> Aman akimvela muthim lhangkhal akihehsah jin, chule Aloupi na meilhang thuh tah twipin akikhange. <sup>13</sup> Aangsung vahchan thethu lah a konin meikong amleng lung ahung leng doh dohjie. <sup>14</sup> Pakaiyin van'a konin van akithinsah jin Hatchungnungpen chun o-thongin thu aseiyee. <sup>15</sup> Aman thalpi ahinkap doh jin adoudal te athe cheh ji'e. Kol a phen a kithe jal lah lah jenge. <sup>16</sup> Chuteng leh twikhanglen togei geiyin akimu theyin, Vannoi bulpi khom jouse jong akimuthei ye; Pakaiyin ahinpho jia Anah homsunga ahu alha teng chuti chun aumjie. <sup>17</sup> Van chungsang langa konin aman eihin huhdoh jin jin, Twipi kinong a konin eiladoh ji'e. <sup>18</sup> Chule kamelma hattah pa akonin eihuhdoh jin, Eihotbol tea konin jong eihuhdoh ji'e; Ijeh-inem itileh hitobang miho hi kei din ahatval jiuve. <sup>19</sup> Ka hamset ni jongle amaho hin eihin del khum jeng jiuve; Hijong leh Pakai in keima eikithopi jing nai. <sup>20</sup> Pakaiyin keima munlen tah a eipui doh jin, Eikipapi jeh in

eihuhdoh jin ahi. <sup>21</sup> Lamdih a kachon jing jeh in Pakaiyin kipaman eipen, Chule kakhut te nin thil dih jeng abol jing jeh in kipaman eipei. <sup>22</sup> Ajeh chu keiman Pakai lamlah na jouse kajui jingin, agilou bol'in ka Pathenchu kada lha khapoi. <sup>23</sup> Ijeh-inem itileh ama chonna dan jouse chu Kamaiya aki lang jing jengin, Hijeh chun ama chon na dan jousea jong Keima kavah mang khapoi. <sup>24</sup> Ama angsunga keima nolna beiyin kaum jingin, themmo na dingah kakivengdoh jing jenge. <sup>25</sup> Hijeh chun keima dihna jeh hin Pakaiyin kipaman eipen, chule ama mitmua themmona kanei lou jeh hin kipa man eipei. <sup>26</sup> "Mi kitah ho hengah nang jong naki tahna namusah in, chule nolna bei mi hengah nang jong nolna bei mi nahina namusah jin ahi. <sup>27</sup> Milung thengho hengah nalungthen na namusah in, chule milung thim thenglou ho hengah nangma alungtheng lou bangin naumjin ahi. <sup>28</sup> Chuti chun nangman mi kineosah techu nahuhdoh jin, mi kiletsah te vang chu suhnem din nave llih jinge. <sup>29</sup> O Pakai nangma hi keiya din kathaomei nahin, Ka-Pathen nangin kei dia muthim jouse nasal vahe. <sup>30</sup> Nangma panpi najala keiman sepai hon khat jong kasuh mang ding, Chule Ka-Pathen vanga palvum jong ka chop khup ding ahi. <sup>31</sup> Hitichun Pathen hi alamlah na jouse achamkim soh keyyin, Pakaiyin mi athutep jong agui lhung ji'e; Chule Ama koma kiselte dinginAma hi ompo ahijinge. <sup>32</sup> Ijeh-inem itileh Pathen kiti chu koi dang ham? Pakai kiti chu ahin; Chujongle songpi kiti chu koipen ham? I-

Pathenu amabou chu ahiye. <sup>33</sup> Hiche Pathen hi keima kisel na dettah ahin, kalam lhah na jouse jong phatah in eisem peh tai. <sup>34</sup> Hichun Pathen in kakeng phang teni jong sajuhpi keng abahsah-in, gamken lah dung jenga jong det tah in eidin sah theiye. ☆ <sup>35</sup> Chule kakhut teni jong galsatje eihil them in, Hijeh chun kabanjang tenin sumeng thalpi aheh konjin ahi. <sup>36</sup> Nangman na mi huhhingna omphe neipen, chujongle nagalvon chun keima eikhu khum jin; nakithopi nachun eisuloupi jin ahi. <sup>37</sup> Kanoiya kapansat na ding mun lentah neihoi peh-in, hijeh chun kakengto teni kalho nal tapoi. <sup>38</sup> Ka melmate nung kadel jin kathat gam ji'e; chule aboncha kasuh gamhel masangin kahung kileji poi. <sup>39</sup> Hitichun abonchauvin kasat chap hel jin koima athoudoh aum tapoi, hitichun kakengto noiya akijam chap tauvin ahi. <sup>40</sup> Ajeh chu nanging galsat din tha neipen, eihin del khumpa chu kanoiya nalupsah tai. <sup>41</sup> Hiti chun kamasanga kamel mate najam sah sah jin, eihot bolte chu keiman kathat gam ji tai. <sup>42</sup> Panpi ngaiya apen pen vanguvun ahuhhing diu koima aumpon, Pakai henga atao vang uvin aman adonbut dehpoi. <sup>43</sup> Keiman kholai dunga leivui bangin kachilngem ngemin, chule kholai dunga bonlhoh bangin kachot phan kachilgoiyie. <sup>44</sup> "Gal eibol khum mitea kon in jong nei huhdoh chun, namtin vaipi chungga alenpenin neisemin, kahet khah louhel miten jong keima kin aboltauve. <sup>45</sup> Gamdang mite jong kineosah tah-in kahenga ahungun, kathusei

---

☆ **22:34** Habakkuk 3:19

ajah jah ule kathun anung jiuve. <sup>46</sup> Gamdang mite chu alungu aneo jin akisel nao kulsunga konin kichatah in kithing pum pumin ahung potdoh jiuve. <sup>47</sup> “Pakai hingjing pa, Nunnom hen kasongpi chu,; Choi-at'in umjing hen Ka-Pathen, eihuhhing na songpi chu. <sup>48</sup> Phu eilah sah a Pathen chun, mijouse chu keima noiya asonkun soh hel in ahi. <sup>49</sup> Kamelmate lah jenga jong eihuh doh jia, chule nangin kaki doupi kamelmate chungu neichoi sang ji'e; Pumhat jenga mi nokhum mite lah a konin jong nangman neihuh doh jing jin ahi. <sup>50</sup> “Hiche jeh hin vo Pakai, namtin la ah navahchoi yinge, chule namin vahchoila sange. ✧ <sup>51</sup> nangman Lenga natun keima hi galjona loupe tah neipin, thao anusa kei hi long louvin eingailui; David le kachilhah te din atonsot atonsot geiya dingin,” ati.

## 23

### *David Kamchang Soh Achaina*

<sup>1</sup> Hiche hohi ahi, leng David'in achaina lama anasei doh thucheng ho chu: Ajeh chu Jesse chapa David'in thusoh ding aseï, choisanga umpan thusoh ding aseï chu; Jacob Pathen thao nusa, Israel chate lah a lathem penpa chu. <sup>2</sup> “Pakai Lhagaovin keiya konin thu aseïyin, ama thuho kakamsunga aum in ahi. <sup>3</sup> Chule Israel Pathenin thu aseïyin, chujongle Israel songpi chun kakoma thu ahin seitai; Thudih'a vaihomba chun Pathen jana neipum in vai ahom

---

✧ **22:50** Rm 15:9

in ahi. <sup>4</sup> Hijeh a chu ama chu achunguva jingkah khovah bangun ahungvah jin, Twimei kailou ni jingkah a jing ninou ahungso abange; chule leiset chungah hamhing le loudong phat-thei sah gotwi hungju lha tobang ahi. <sup>5</sup> Hitobanga hi keima Insung jong Pathena lhan hilou ham? Ijeh-inem itileh Pathenin atonsot geiya dingin kitepna khat eisempin, thil ijakai hi abih bih chan aumsah soh keiye. Ajuh chu Pathen chun Kei deichat jouse le eipanpi thei jouse akhansah lou ding ham? <sup>6</sup> Ahin Pathen hepha lou te vang chu ling le khao kikat tan a kipai mangsa tobang ahiuve, Ijeh-inem itileh amaho hi khut'a kichom khom kit thei louhel ding ahiuve. <sup>7</sup> Hitobang miho thamkha ding jong chun thih le tengcha akipat ding ahin, abonchauva hi beihela meiya kigouvam hel ding ahiuve," ati.

### *David Sepai Gal Hat Miho*

<sup>8</sup> David lengpa sepaite lah a dinga galhat mite chu aminu hicheng hi ahiuve: Joshobeam kitipa chu Hacmonite mi ahin, amahi mi thum lah a alamkai ahi; chule ama hin mi jaget jen tengchan akikat pin abonchan khatvei yin atahat gam hel'in ahi. <sup>9</sup> Chule ama ban a mihat mithum holah a khat kitpa chu ahile Ahoah chilhah, Dodai chapa Eleazar ahi; ama hi Philistinete galbol dia ahung kikhop'u chun David toh ana pang khomin, chu in Israel chate chu Philistinete masanga ak-inungtol tauve. <sup>10</sup> Eleazar hi akipan in abantha acholdeh kahsen Philistinete asat chap chap jengin akhut jeng jong chu achemjam chutoh thisanin atomchah jengin ahi; hiche nikho jong chun Pakaiyin Israel chate minthang tah in gal



ajosah tai; chule Eleazar nunga chun sepaite thilong chom khom mai maiyin ahung kitol'uve. <sup>11</sup> Chule Eleazar ban a mihat athum chan napa chu Shammah ahin, ama hi Harar mi Agee chapa ahiye. Amahi Lehi khoa chun Philistine galbol din ahung kikhomuvin ahileh, akikhop na'u tolhang dunga chun louthul adimset'in akeh'e; Ahin chimun a chun Israel chate chu Philistine gin nan ajamtauve. <sup>12</sup> Ahivang in Shammah hi det tah in apangin, louthul lei laiya chun apang jinge, hiti hin hatah in apang jingin, Philistine chu atahat that jengin ahileh Pakaiyin jong loupitah in Shammah chu gal ajosah tai. <sup>13</sup> Haosa mi somthum lah a mithum chu achesuh uvin, chang-at phat don hin Adullam songko phunga chun David henga ahunguvin ahileh, Rephaim phaiya chun Philistine sepai hon khat'in ngah mun anasem'uve. <sup>14</sup> Hiche pet hin David chu kulpi sunga anapange; chujongle Philistine mite sepaiho chu Bethlehem khopia ana pansa uvin ahi. <sup>15</sup> Dangchah geovin David chun aseiyin, "Ohe, mihem khat cha behin Bethlehem khopi kulpi kelkot phunga twikula konin twi eihin dop peh hen lang don din eihung petave leh!" ati. <sup>16</sup> Hichun hiche mihat mithumho hin Philistine ngahmun kimlai tah chu atum keh jenguvin Bethlehem khopi kulpi kelkot phunga twikula twi chu agathal'ugin, David henga ahin dop peh tauve. Ahin David chun donjo talouvin atwi chu Pakai lhai nan tol'a asung lhan; <sup>17</sup> Chulehitin aseitai, "Vo Pakai, keiman hiche twi hi don hih hel inge. Iti ahinkho phal ngam hel a hiche twi thal a che ho thisan tobang hiche hi keiman

kadon ding ham?” ati. Hiche jeh chun David’in twi chu adonta poi. Thil hijatpi hi hiche mihat mihangsan mithum ho chun anabol’u ahi.

*David Gal Hang Mi Somthum*

<sup>18</sup> Chujouvin Joab sopipa, Zeruah chapa Abishai chu mihat som thum lah a lamkaiya anapang ahi. Chule amahin mihem jathum jen chu atengcha akipat’in akisat pin abonchau chun athat gam hel in, mithum ho tilouvin ama jong chu aminthang pen in apangtai. <sup>19</sup> Mihat som thum lah a jong ama hi aminthang pen tah a pang ahi. Hijeh chun ama hi amaho gal lamkaiyin jong apange; mihat thumho lah a ajaolou vang’in. <sup>20</sup> Kabzeel khoa mi Jehoiada chapa Benaiah kitipa jong chu gal-hang tah mi ahin, chule thil nasa tah tah boldoh jeng thei ahi; amahin Moab mi sakei tobang ni athat’in, chujouvin nikhat hi buhbang lhah nin achesuh in kokhuh sung khat’a sakei bahkai khat agathat kit’e. <sup>21</sup> Benaiah hin Egypt mi pasal tha hattah le melhoi tah khat jong athat’e. Egypt mipa chun akhut’a tengcha khat akichoi ahin, Benaiah chun tenggol khat akichoiyin ajongsuh jengin, hichun Egypt mipa khuta konin atengcha chu alah peh in ama tengcha ma ma chun hiche Egypt mipa chu athat tai. <sup>22</sup> Jehoiada chapa Benaiah chun thil hijat hi ana bol in, mihat mi thum lah a chun aman jong minthan na aneitan ahi. <sup>23</sup> Chule ama jong hi mihat somthum lah a aminthang lseh tan, ahivangin mihat thumho lah a chun ajao napoi ahivang in David chun amapa hi ama tahsa vengtup sepai lah a lamkai

din apansah tai. <sup>24</sup> Mihat mi somthum lah a chun Joab sopipa Asahel jong khat anahi. Elhanan ahin, ama hi Bethlehem khoa Dodo chapa ahi. <sup>25</sup> Harod khoa mi Shammah ahin, Harod kho mi ma ma Elika ahin, <sup>26</sup> Pelon khoa mi Helez ahin, Tekoa khoa mi Ikkesh chapa Ira ahin, <sup>27</sup> Anathoth khoa mi Abiezer ahin, Hushah khoa mi Sibbecai ahin, <sup>28</sup> Ahoah khoa mi Zalmon ahin, Netophah khoa mi Maharai ahin, <sup>29</sup> Netophah khoa mi Heled chapa Baanah ahin, Benjamin mite Gibeah khoa mi Ribai chapa Ithai ahin, <sup>30</sup> Pirathon khoa mi Benaiah ahin, Nahale - Gaash luidung lama kona hung Hurai ahin, <sup>31</sup> Arabah khoa kona Abi-albon ahin, Bahurim khoa mi Azmaveth ahin, <sup>32</sup> Shaalbon khoa mi Eliahba ahin, Jashen le Jonathan chapate ahi uvin, <sup>33</sup> Harar khoa mi Shagee ahin, Harar khoa akon mi mama Sharar chapa Ahiam ahin, <sup>34</sup> Maacah khoa mi Ahasbai chapa Eliphelet ahin, Giloh khoa mi Ahithophel chapa Eliam ahin, <sup>35</sup> Carmel khoa mi Hezro ahin, Arba khoa mi Paarai ahin, <sup>36</sup> Zobah khoa mi Nathan chapa Igal ahin Gad mi Bani ahin, <sup>37</sup> Ammon mi Zelek ahin, Beeroth khoa mi Naharai ahin, Zeruah chapa Joab galvonpoa pang pa ahin, <sup>38</sup> Jattir khoa mi Ira ahin, Jattir kho mi ma ma Gareb ahin, <sup>39</sup> Hit mi Uriah ahin, abonchauvin somthum le sagi alhinguvin ahi.

## 24

### *David In Mi Asimtoh*

<sup>1</sup> Israel chate chungu Pakai Pathen ahung lung hang kittan , hijeh chun aman David chu atil doh'in amaho dou nan, hitin thu aseieye,

“Nangma chen lang Israel chate le Judah mite gasim toh tan,” ati. <sup>2</sup> Hijeh chun lengpan Joab le apanpi sepai lamkai ho koma aseiyin, “Sahlam Dan apet lhanglam Beersheba chan geiya cheng Israel phung jouse gakhoh toh soh keiyun lang mihem ijat mong mong hitamti kahet doh thei na dingin mihem jat gasim tauvin,” ati. <sup>3</sup> Ahivangin Joab chun lengpa koma chun aseiyin, “Pakai na Pathenin mipi ho chu aja ajan punsah jeng tah ta, kapu lengpan namit a namu jeng nah chu me; ipi dinga kapu lengpan hitobang pihi bol ding nagot hitam?” ati. <sup>4</sup> Ahinlah lengpan amaho chu mi agasim toh diuvin aseitan ahi, hijeh chun Joab le sepai lamkaite chu Israel mipite simtoh dingin lengpa angunga a konin avaikon doh tauve. <sup>5</sup> Chuin amahon amasapen in Jordan vadung chu apal galkaiyun lhanglam khopi phaicham, Aroer khopi Gad lam jot na ah chun aponbuh asongun, chujou vin Jazer langa achi pei taove. <sup>6</sup> Chujouvin Hit mite gamsunga Gilead kho le Kadesh khopi ahung geitauve; chuin Dan khopia ahunguvin Dan khopia konin Sidon lang ajong kit tauve. <sup>7</sup> Chuin Tyre gammang lah ahinjot’uvin Hivi mite khopi jouse le Canaan mite khopi jousea ahung uvin ahi. achainan Beersheba khopi Judah gamsunga Negeb a chun anga uve. <sup>8</sup> Hitia hi gamsung pumpi ahin kholsoh kei phat’uvin, lhako le ni somni alhin donin Jerusalem khopi ahung kilekit tauvin ahi. <sup>9</sup> Chuin Joab chun mihem jat asim nau mijat chu lengpa henga apelut tai; hichea kisim doh Israel mijat chu pasal galsat a chemjam choithei cheh sang jaget alhingin, chule Judah mi chu sang

janga alhinguvin ahi.

*David Achonset Jeh'a Thutanna*

<sup>10</sup> Hitichun mipi asim soh phat'uvin David chu alungthima akisih behseh jengin, hijeh chun David injong Pakai henga taona anei jin hitin aseitai, "Kathil bol chung changa hin keima melsa tah in ka chonse tai; hijongle tuhin vo Pakai, nahenga kahung tao ahi, nasohpa keima themmona jouse hi lamang tan; ajeh chu keiman ngol hoitah hin thil kanabol tai," ati. <sup>11</sup> Chuin ajing jingkah matah in David chu ajingtho a ahileh David dinga amitva neiya pangpa Gad themgaopa henga chun Pakaiyin hitin thu ahin-seiye. <sup>12</sup> "Chen lang David koma hitin gaseitan tin Pakaiyin aseiyee, "Keiman na chungga katoh ding thil thum ka peh ding, hiche thil thumho lah a chu nangman na ngap chat pen pen khat chu kilhen in hichu nachunga kahin lhun sah ding ahi," tin aseiyee, gatin, ati. <sup>13</sup> Hijeh chun Gad jong David koma ahungin hitin aseitai, "Nagam-sunga kumthum sunga kel lhah ding nanop em? Lhathum sunga nagalte masanga najamle lea amahon nadel le le diu nadei em? Ahiloule nagamsunga nithum gamna hise nasatah lansah ding nanop em? Tun geltoh soh keiyin lang eihin solpa henga kaseipeh ding chu hoiche pen ham, dindetna neiyin," ati. <sup>14</sup> Chuphat in David chun Gad koma hitin aseiyee, "Kalung agim beh seh jeng tai; ami khotona lentah ahinai, hijeh chun Pakai khut'a kileh lut jeng taute; mihem khut'a vang neilhah lutsah hih hel'in," atipeh e. <sup>15</sup> Hijehchun Pakaiyin Israel chate chungga

jingkah a pat aphot kitep sungsen gamna hise ahin lansah tai; hichea hin sahlam Dan khoa pat lhanglam Beersheba chan geiyin Israel mipi lah a mihem sang som sagi athiuvn ahi. <sup>16</sup> Hichun Vantil chun Jerusalem jong suhgam dinga agot'a akhut alap phat chun Pakaiyin thilse abol ding chu alung akhel'in Vantil mi sugama pangpa koma chun hitin aseitai, "Aphaset tai, tun nakhut umthim sah tan," ati. Hichepet a hi Pakai Vantil chu Jebus mipa Araunah changvohna mun changphol koma ana ding ahitai. <sup>17</sup> Chuin David jong chun mi sugama pang Vantil chu amudoh phat in Pakai koma hitin aseie, "Vetan, keima kachonsen, gilou tah in keiman thil kabol tai; ahinla hiche mihohi kelngoi banga emahelou ahibouve ipi abolset anei mongu ham? Nahenga katao ahiye, keima chung le ka inkote chung a nakhut hin lhah jon," tin aseitai.

*David In Maicham Asem*

<sup>18</sup> Hiche nikho hin Gad chu David henga ahungin akoma hitin aseie, "Chetouvin lang, Jebus mipa Araunah changphol koma khun Pakai dingin maicham khat gasemtan," ati.

<sup>19</sup> Hichun Pakaiyin Gad thu apeh bangin David jong chu achetou vin agabol tan ahi. <sup>20</sup> Chuin Araunah chu akiheijin agahven ahileh lengpa le asohte ama kom lam jona ahungu chu amun ahi; chuphat'in Araunah jong chu apotdoh pai paiyin lengpa chu agajabol'in tol'a amai asulut'tan ahi. <sup>21</sup> Chu jongle Araunah chun hitin aseie, "Ipi ding pen tah a kapu lengpa nangma nasoh kei koma nahung jeng hitam?" atileh; David

chun adonbut'in "Mipi chungam gamna hise hi akitol mangthei na dinga nangma changphol hi chohdoh a hikoma hi Pakai henga maicham khat semdoh ding kati ahi," ati. <sup>22</sup> Hichun Araunah jong chun hitin aseieye, "Kilah jengin kapu lengpa, chule nangin pha nasah lam pi a chun mang jengin; chule bongchal teni jong pumgo thiltoa naman dingin hikoma hin aum lhone; chujongle chang huina kangkui ho leh bongchal teni namkol jong hikoma hin aumnai; hiche hohi meithinga nati ding ahi. <sup>23</sup> Vo lengpa, Keima Araunah kitipa hin lengpa dinga thil ejakai katodoh jeng ding ahi," ati. Chujongleh Araunah chun lengpa koma hitin jong aseieye, "Pakai na-Pathenin nataona chu nasan peh teitei hen," ati. <sup>24</sup> Ahivang in lengpan Araunah koma chun hitin aseieye, "Ahipoi, keiman na changphol man chu kapeh a kachoh ding ahibouve; aman kapeh louhel thil chu keiman Pakai ka-Pathen henga pumgo thiltoa kato lou ding ahi," ati. Hiti hin David chun changphol leh bongchal teni chu dangka shekel som ngan akichoh tai. <sup>25</sup> Hichun lengpa David chun Pakai anga maicham khat asemin, pumgo thilto le chamna kilhaina thilto atoh tan ahi. Hichun Pakaiyin jong gamsung dinga a taona chu asanpeh in Israel chate chungam konin gamna hise lang chu akitol mangsah tan ahi.

**PATHEN LEKHABU THENG**  
**The Holy Bible in the Chongthu Dialect of India**

Copyright © 2020 Chongthu Bible Translation Team

Language: Chongthu (Chin, Thado)

Dialect: Chongthu

This is a draft copy of a work in progress. It will be updated.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2022-11-09

---

PDF generated using Haiola and XeLaTeX on 11 Nov 2022 from source files dated 9 Nov 2022

3254801d-c34e-5c2b-be2e-99bf486ad253